

# Yehezkiel

## Nabi Yehezkiel arye nyalamuk yupu

---

Minop talak Allah el yupu laka lena deiyoknye, el si Yehezkiel birye, Allah el dirina weik ning tonok eibukce, nyabuk yupu

**1** <sup>1</sup>Ara, atalak ara, keteng tamun yupa weik yupa tonok kepdopnye pamu barye (tiga puluh tahun 30) ubuk.<sup>a</sup> Dumu wala arye, like pamu sum (tanggal 5) ubuk sum ara,<sup>b</sup> Atalak ara, Babel mutuku ninye deiyoknye Sisinanye Nebukadnesar ap, el yin talin nang ap arye, Israel ninye tongobuka tapu koubikce, Babel mutuku bobinamsikba, daulamupa ani, keteng tamun pamu barye akunum kibukop ura, mek si Kebar mek lelung unbase. Ara, na Yehezkiel ap, Babel mutuku nang arye, yuk Israel ninye bobuka delilbalamik ninye ap, Kebar mek lilunak unmapu. Atalak ara, Allah arye im deice bublan kukibukba, weik mambul ning ton, laka kipsukba, na arye eipse. <sup>2</sup>Ibrani nang arye nuklamap touk, dumu wala arye, like pamu sum (tanggal 5) ubuk sum aniryuk, aning eipse. Ara, Babel mutuku nang arye, nun Israel ninye

---

<sup>a</sup> **1:1** *keteng tamun 30* – Ibrani yupu weik kel nang arye, ton nang ara, nyanyake. Ara, Yehezkiel el babye kam ulamuk keteng tamun 30 kibuk ati nyabuk, nyanyake. <sup>b</sup> **1:1** *wala dum barye tanggal 5* – Ibrani yupu weik kel nang arye, ton nang ara nyanyake. Ara, Yesus min kum yanamuk talak keteng tamun 593, Juli wala tanggal 5 ati, anyanyake.

talyamsuk ninye deiyoknye, el si Yoyakin tongobuka, tapu koubikke bobinamika ani, keteng tamun pamu barye akunum ubuk talak ara, aning eipse nyapne.

<sup>3</sup>Na ni koproba el si ara Busi. Na ni Busi bira, Allah el si erena aik fum tam, fil donanye ulamuk touk, na ara el mi Yehezkiel birye, afil uk donune. Allah el si Yahweh<sup>c</sup> arye, el mikip aripnuka deice arye, mambul ning laka upmokba, eipse. Aulamse talak arye kekenmasebuk, Allah arye mambul yupu ton nyapnuke. Allah el si Yahweh arye, mambul yupu nyapnuka ara, Babel mutuku noutam bukni, mek si Kebar mekin dam unmase talak arye, ayupu nyapnuke. Nyapnukce, Allah arye na ti, ‘Na yupu laka nyalbinamle’ tenen, el mikip na nong deice deipnuke.

<sup>4</sup>Allah arye yupu nyapnuk talak ara, na arye dipkoprop dinmasiba, kumanya mikip weik ning ton, outam arye dobukba, mikip weik asa arye, dua bum kat ning weik arye bopdakuka yayuk. Adua deice ara, uku buk weik arye lenggerekenmokba, adua dana-dana tam nirya ap, im deice tam nirya ara, dirina fia weik ubuk. Auku noutam, kiklina ara, kat ning uku pakanmalye noutam dapmakibuk, bupu fia weik uplirye, bi ubuka ongolamle touk ubuk.

<sup>5</sup>Winibuk talak, auku noutamak dinmasiba, kam ulul ning dum barye unmekak eipse. Aning dum barye nirya ara, sik urasin ninye urasin atonun unmekak na arye eipse.<sup>d</sup> Akam ulamle ning dum barye ning, sik urasin ara, mitikto ninye urasin atonun unmekba, na arye eipse. <sup>6</sup>Adum barye kam ulamak ning ara, mitikto ninye urasin atonun upmek bukni, adum barye ning sik nong ara, tonok bukni, sik urasin ara, yuk-yuk dum barye uk unmek. Sik nong ara, tonok-tonok unmek bukni, tonok nong ara, kisok ap, urasin ap ara, dum barye ubuk touk, sik pol babye yuk-yuk dum barye ubuk. Sik nong deice nirya awamuk pol ara, maka pol atonun ubukak, na arye eipse.

<sup>7</sup>Tonda kam tuba ulamak ning, sik yan nirya ara, fung dem uk ubuk. Aning ubukba, sik yan nirya ara, sapi basam yan kala ulamle touk

---

<sup>c</sup> 1:3 *Yahweh* – Allah el si koproba ara, ‘Yahweh’ ulule. Allah arye Musa ati, ayupu lakak arye nyabuk (Keluaran 3:14). Ibrani yupu deice arye ahuruf ‘YHWH’ aning uk sekenyake. Ibrani yupu nyanyak ninye arye, ‘Allah el si koproba lakak kum nyaptibye’ tenen, ilil ulule. Ilil ulula ati ara, sikce huruf ‘YHWH’ aning uk sekenyake. Bukni, Allah arye Musa ati, “Kume na si ara, ‘Yahweh’ unune. Asi Yahweh bikmunce asi uk erebuka na ati kinamuululume,” nyabuk. Ibrani kili sal arye huruf YHWH sekenyak bukni, ‘Ahuruf uk sekipyop ura, ayupu nyana ara, walwal upsilyak’ tenen, nunce ‘Yahweh’ sekenyabe. Indonesia Alkitab noutam ara, Allah el si Yahweh kum sekenyake. Sikda, ‘TUHAN’ sekenyake. Bukni, Indonesia Alkitab noutamak nirya, ‘TUHAN’ eipmunyop ura, ‘Ara Allah el si Yahweh sekenyak sukum,’ tenenamululume. Allah el si Yahweh nyana ara, fia teleb uke. Tonda, laka nyana yupu nomor 49 dipdelulume. <sup>d</sup> 1:5 *kam ning* – Aning ara, Yehezkiel birye, ‘Kam ning uk’ nyalamuk bukni, ton kel nang arye, ‘Malaikat eibuk do? Malaikat el si Kerub eibuk do?’ nyabuk. Bukni, nun nirya ara, mitik walwal usulule.

ubuk. Ara, sik yan nirya ara, kat ning el si ara, tembaga winiryuk memepdeipmace talak, urasin teleb ulamle touk, mil weik ubuk. <sup>8</sup>Adum barye kam ulamak ning, sik pol baru tam dum barye tam nirya bukni, sik pol amutam ara, ninye taruk atonun, taruk ton aubuk. Akam ulamak ning dum barye ara, yuk-yuk bukni, sik ninye urasin atonun ubuk ning ap, sik maka pol ato ning ap ara, sik nirya neiktoto ubukba, na arye eipse. <sup>9</sup>Akam ning unmek ning, sik pol nirya ara, neiktoto lang-lang buka banmikce, singnilanmekak, eipse. Sik pol mouse siryak nirya ara, bol pibuka lingnipdanin banmik. Sik banmek talak ara, fung bisik uk banmekce, bisik ton kirikuka kum banmek. Diksukum bisik uk banmekba eipse. Sik banmek talak ara, sik nong nirya tamubuka dilina fia kumce, fung diksukum dem uk banmekba, na arye eipse.

<sup>10</sup>Ati aning sik urasin eipse ning ara, laka nyapnune. Sik kam un ning dum barye bukni, sik urasin ara, neiktoto ubuk. Sik nong ara, tonok bukni, sik urasin yuk-yuk dum barye ubuk. Bukni, tonok urasin ara, ninye urasin atonun ubuk. Ton urasin sirik tam ning ara, bai tam ulamle yu weik kuse, el si ara singa kuse atonun ubuk. Sik urasin kwanim tam ning ara, sapi basam atonun ubuk. Tonda, sik urasin balye tam ara, weik bip maka atonun ubukba, na arye eipse.

<sup>11</sup>Sik nong deice dana-dana tam, dum barye ubuk ning nirya ara, maka pol atonun ubuk ura, sik pol nirya erebuka talilanmek. Sik nong nirya pol bitinye arye, dinikdongopdayikce, ton pol bitinye ning ara, yongkaleklobikba, sik nong nirya pakupdongobukba eipse. Ati, tonok kam ulamuk ning, el mining dam tikmok kam ning ara, sik pol epdanuka unmarik. Ton tam pol bitinye arye, sik nong yuk-yuk bukni, sik nong uk kitibuka, dungnupdongoprik. Sik nirya atonun wininmekbuk, na arye eipse. <sup>12</sup>Sik kam ulamak ning unmik ning nirya, pol yuk-yuk eleb-eleb ning ara, sik bisik diksukumuk bana ati, kintinibikce banmik. Ara, 'Dib Kanye arye nyapsilye touk binuyabe' tenen, ketenebikce, Dib Kanye banmok touk, sik babye banmek. Sik banmek talak ara, neiktoto uk banmek, dana-dana tam kirikuka bana fia kume. Diksukumuk banmeka ati, 'Tamubuka kum yatibye,' tenebik.

<sup>13</sup>Akam unyak ning, sik nong noutamak arye ubuk ning ara, uku sekmakiba, uku dinmalirye, uku duk lonmalirye, bi paralamle tonun ubukba eipse. Tonda, sik dum barye bukni, sik kan-kan ara, weisa ubikiba, dirina weik ulamle touk ubukba, na arye eipse. Auku buk noutamak nirya ara, dirina weik ubuk. Tonda, auku buk noutamak arye, bebeya lakna weik arye ubukba, mil parabuka bindakuk. <sup>14</sup>Winibukop ura, sik dum barye kam unmek ning nirya arye, bebeya laklamle tonun ubikce, minopce lakuka banmekba eipse. Sik dum barye kam un ning ara, otam binmana, atam yanmana kinmekba, na arye eipse.

<sup>15</sup>Awininmek talak ara, dipkoprop na arye dinmasiba, sik dum barye kam un ning yuk-yuk bukni, sik yan serek dum barye ara, sik tikmek

sukumuk, tuku deice uk, upmokba eipse. Sik nong tonok bukni, urasin ara dum barye ubuk ati, tonok kam un ning ara, el nong amutam ara, yan serek tonok ubukba eipse. Sik kam ning dum barye unmek touk, yan serek babye, dum barye ubukba, na arye eipse. <sup>16</sup> Aupmok yan serek, sik urasin ara, dirina weik uplirye, mil dang-dang alamle ning, dekna weik keil, el si ara permata nyalamak keil atonun ubuk. Sik yan serek nirya ara, tonok ning babye, yuk ning babye nirya, ansinibuka noutam uk kintinibuka deiamikba, na arye eipse. Ton mitik roda ara, weik yan serek anoutam uk, deibikba aubuk.

<sup>17</sup> Tonda, sik nirya arye ayan serek ara, nirya dopdobikce, sik dum barye kam un ning unmek ning urasin dinmek tam uk banmek. Sik nirya, 'Atam binun' tenepne tam uk, talye balamik bukni, ton tam banmek talak ara, kum tamubuka yayik. Sik nong ap, urasin ap ara, ton tamubuka kum dilinmek. Diksukumuk banmek. <sup>18</sup> Ayan serek ara, koubuka darapdongomik ning nirya ara, asing babye nirya daryamikba, na arye eipse. Ayan serek ara, ongopeibik ning ara, cang weik ubukba, aning eipse anya arye, 'Se aning ara, weik mambule,' tenepse. Sik dum barye kam un ning nirya, sik yan serek lilunak nirya ara, asing weik wamuk. <sup>19</sup> Ara, sik kam unyak ning nirya, balsusunmek talak ara, sik ayanuka yan serek nirya babye, balsusunmek atonun binuka, yanuka kinmek. Tonda, kam un ning nirya lakuka, eitam welebanmek touk, ayan serek dum barye nirya babye, abisik uk welebanmek.

<sup>20</sup> Tonda, kam ning dum barye ara, sik dib kanye ara, sik yan serek dum barye noutamak aubuk. Ati ara, sik kanye arye, 'Atam binun,' tenepman touk, sik kam ulamik ning nirya babye, abisik uk balamik. Atonun sik ayan serek babye atonun, ubuka banmik. Tonda, ayan serek ara, noutam koprop ulamik kanye arye, 'Banuyap,' tenepman touk, sik kam un ning dum barye, abisik uk neika banmek. <sup>21</sup> Adib kanye banmek talak ara, akam unyak ning nirya ap, sik yan serek babye abisik uk banmek. Sik dib kanye bataknop ura, sik kam un ning ap, sik yan serek ap ara, bataanmike. Sik tukwak arye im noutam welepne talak ara, sik kam un ning babye, welena uka. Aning ati ara, kam un ning nirya ara, sik dib kanye ara, sik yan serek noutam uk ulamika ati, neika uk banmek.

<sup>22</sup> Tonda, kam un ning dum barye, sik kisok deice tam, im noutamak atonun ara, aik arum atonun ning wamuk. El urasin ara, keteng deipliba, ikip mek es deice, til daklamle atonun, ubukba, eipse. 'Aning ara, keteng deiplirye, dirina weik uplibuk, weik asik seng til daklamle atonun ning uple,' tenepse. <sup>23</sup> Atil daklamle ning amutam ara, akam ning dum barye sik pol ara, fung bibik talibikba, sik pol mouse ara, bol pipdayik. Sik pol ton bitinye arye, sik mining nong uk kitibuka, dungnupdongobik. Sik nirya atotouk wininmekbuk, na arye eipse.

<sup>24</sup>Sik akam un ning nirya, pol deice arye lakuka banmekba, pol lelim weik arye nyanmokbuk kekepse. Ara, weik mek lum sakanmalirye, lelim lelamle atonun, nyanmoke. Tonda, yin talin nang arye, ‘Yuk nang olbinamap’ tenen, yin lelim weik arye nyalamak touk nyabik. Tonda, aning-aning nirya, talibuka deice tam ulirye, Weik Erenanye, el yupu weik arye nyaliba, lelim weik lelamle tonun, sik lakuka banmek talak ara, sik pol lelim weik nyabik. Winipmanto ara, yin talin nang weik arye bulubikirye, yupu weik arye nyakiba, lelim weik nyalamak touk, banmek talak ara, weik lelim nyanmek. Bukni, sik tunimabuka unmek talak ara, sik pol ara, tukwak tam deibikba, sik pol lelim tunimabuk ura, anirya tunimabuk.

<sup>25</sup>Aning atonun, sik kisok deice tam, weik til daklamle ning, seng aik arum atonun ning, im deice tam arye, ninye yupu atonun lenmokba, sik adib aryuk kekebikce, tunimabuka, tonap kum banmek. Winibuka tunim abik talak ara, sik pol ara, tuku deice deibikba, sik pol babye, lelim fia kum lenmok. <sup>26</sup>Eitam ubuk ning, aik arum atonun ning deice tam ara, weik ninye deiyok nang bulamak ning atonun ning ubuk. Abun ning, el urasin ara, dekna weik keil, el si ara nilam keil, el urasin puturuna ara, im kalum atonun ubuk. Tonda, abulamak ning deice tam ubuk ning ara, ninye urasin atonun kam un ning ton upmokak eipse. Akam un ning ara, ninye urasin atonun ubukbuk, na arye eipse.

<sup>27</sup>Tonda, aninye urasin atonun upmok ning dinmasiba, el der tam arye diprongobuka, el nong deice tam nirya ara, mil ara, besi ning uku dapmakibuk, bupu weik uplirye, uku weik arye ongolamle touk ubuk. Tonda, bebeya lakuka liman olamle touk wamukce, el der tam arye dibuka, el nong outam ning ara, uku buk dilamle tonun ubukce, mil weik unmokba eipse. Winibukba, dana-dana tam nirya ara, keteng sinarya dirina weik ulamle touk ubuk.

<sup>28</sup>Aning atonun dinmasiba, anye bira el nong dana-dana tam nirya ara, dirina fia weik ubuk. Winipmanto ara, el dirina urasin ara, mok cebuka alakmalirye, manu senamnya dua deice maplirye, senamnya yuk-yuk ulamle touk ubukba, na arye eipse. Allah el si Yahweh, el dirina ara, manu senamnya deiplirye, keteng sinarya deice donokliba, til daklamle atonun ubukba eipse.

Adirina ap, aning-aning nirya ap, eipse talak ara, ‘Allah el aunmala ati, talye mangkau kibuka kum eiptinye’ tenen, el si erena ati, kisok kanupdongopsirye, tukwak dipdongobuka mapmase. Winibuka kanupdongobuka, tukwak mapse talak aryuk, ninye yupu atonun yupu deice arye, nyanmokba kekepse. Ara, Allah arye, ‘Yehezkiel elda, na yupu laka nyalbinamle’ tenen, yukupnukba kekepse.

Allah el yupu laka lena deiyoknye, nabi Yehezkiel birye nyabuk.

**Allah arye, ‘Anye Yehezkiel bira, na yupu laka  
nyalbinamle’ tenen, yukubuk yupu**

**2** <sup>1</sup>Allah el yupu laka nyananye, nabi Yehezkiel birye nyabuk. Allah arye na Yehezkiel biti nyapnuke. “Se anda ninye arye deipkiknye, anda tikuka kekelaminbuk, na arye an ti yupu nyalinamkine,” nyapnuk.

<sup>2</sup>Ara, Allah arye na ti yupu deiyok koubuka, nyanmanuk talak aniryuk, Allah arye el Dib Kanye aripnukba, na talima noutamak yanuka weknukce, tikeipnuke. Winipnuk talak ara, Allah arye yupu nyapnukba, kekepse. Elce nyapnuk ning ara ani.

<sup>3</sup>Anda ninye arye deipkiknye bira, na arye wipdeipkina ara, talye ati kume. Israel ninye nirya arye na yupu yaniptabuka mandipna kanye bobuka, malye weik unyak ninye ati, ‘Sik noutamak ulamince, na yupu dobuka, sik ti peterenalam’ tenen, wipdeibkine. Tonda, minop talak arye diprongobuka winitalak nirya babye, sik apu yapu arye, na yupu yaniptabuka malye upnin yangalamik touk, winitalak unyak Israel ninye babye, aning atonun tuba wininmake. Na arye nyalinye yupu yanibuka wininyake.

<sup>4</sup>Tonda, dadeipdanin yangalamik ninye babye, winitalak unyak Israel ninye nirya ara, kisok yung kat ubuka unyak ninye anya arye, na ti si erebuka kum kininyake. Ati, an ti nyalikinye yupu dopropmince aninye ati, peterenalame.

Allah el si Yahweh arye, aning nirya talibuka, deice tam ulul Weik Erenanye birye, nyasilye yupu ara ani. Allah arye tenelul touk, aning-aning nirya talibuka fil dolule. Allah Yahweh arye wipdeipkuka ati, ‘El yupu peterepnusine,’ nyabuka, peterepra banamlame.

<sup>5</sup>Anda luba kina kume. Sik Israel ninye nirya ara, kanye kat bonyaka ati ara, na yupu yaniltakana uk unyake. Ati ara, ance peterepra balamin bukni, sikce kekenamkiyak talak babye, an yupu kum kekenamkiyak talak babye atonun, na arye melipkinirye, aminyan talak upnamle ning laka nyan yupu nyapminba, adeice arye, ‘E dipkoprop anye bira, nabi ulule’ tenen, sik kel kipnamkiake. Tonda, ‘Se, dipkoprop, Allah el yupu lak lena deiyoknye, nun noutamak uk ulirye, Allah el yupu nyasulule’ tenen, biknamake.

<sup>6</sup>Nyabuka nyanamlam bukni, mandipna kanye bobuka, kum kekepkipcop ura, anda ninye arye deipkiknye ulyama anya arye, sik ti eipmince, ilil una kume. An yupu kekebuka batakica babye, sikce an ti, ‘Anda nun like,’ nyabuka, malye yupu nyanamkeyaka babye, ilil una kume. An yupu ati bisipnamkiyak ninye unyaka atie. Ati sik ulamaka noutamak talye kanye bobuka, na fil uk donamlyame. Winipmanto ning ara, ninye ara sik unyak mutuku ara, tace ning ap, mumundik ninye si tolamle ning ap, ninye on ning aning-aning ap, weik aulula noutamak ulamice talak arye, ilil ulamle touk, anda aning atonun, ilil kum unalame. Aninye ap, ikin ning an nong deice deipnamkiyaka ati, ilil una kume. Fin-fin asa arye kanye deibuka, ilil una kum dip aryuk unalame. Luba kilongona kume, sik Israel yala ninye ara, yupu bisipnin yangan ninye unyaka ati nyapkine.

<sup>7</sup>Ati ara, na arye nyapdeipnukin yupu ara, Israel ninye noutamak malye tenebuka, talye mangkau kibuka peterepmin bukni, anang arye

kekepnamaka babye, kum kekepnamaka babye, na yupu peterena uk unalame. Aninye ara, kat kanye bokirye, mandipna kanye bobuka, na yupu kekena kum ninye unyaka ati, ance nyanalam yupu ara, kum kekenamkiyake, nyapkine. Aning ara luba kina kume. Allah arye Yehezkiel na ti nyapnuke.

<sup>8</sup>Nyabukce, ayupu ton dukgongobuka nyabuk. “Se, ninye arye deiamkiknye Yehezkiel anda, na Allah arye nyapkin yupu, moubuka kekepnilyame. Israel ninye arye, sik kanye talima erebuka mandipna unyak atonun, anda atonun kum unalame. Kat kanye bona meme. Ninye arye, sik mapu din ning aripnuce talak ara, kanye deibikirye, si akuka minopce dilamak touk, unalame. Ara, na arye na yupu nyapkinyop ura, na nyapkinye yupu nirya, adib aryuk kekebuka, kanye deipmince, ayupu dopropnamlyame. Tonok ning babye kum bataknamlyame.” Allah arye, Yehezkiel na ti nyapnuke.

<sup>9</sup>Nyapnuk talak aryuk, na arye dinmasibuk, taruk ton na dam donokmok. Ataruk fum bisik ara, mitik buku atonun ning ton, kitibuka bopmok. <sup>10</sup>Ara, abuku atonun ning, kitipmok ning ara, na dam akunum deibukop ura, na arye dipdesibuk dana tam, dana tam nirya, alip tam ap, amutam ap, nirya sekamik ning dem uk wamuk. Asekna ning deice sekamuk yupu ara, bouku sukubuka weik engenyak yupu ap, ikin upnamle yupu ap, mambul kanye bobuka nyalamak yupu ap, imun kanye bobuka engelamak yupu ap, sekdeiyamuk ning upmokak eipse.

**3** <sup>1</sup>Yehezkiel birye nyabuk. Allah arye na ti nyapnuk. “Se, ninye arye deipkiknye bira, an dinmalamba, akitipse buku ninye wenena yupu buku ara, an dobuka diplyame. Ara, an dipmince, Israel yala ninye unyak mutuku nirya biminced, ayupu nyalbinamlyame,” nyapnuke. <sup>2</sup>Nyapnuka ati, ‘Abuku dipnun’ tenen, si akuka yokeipnukba, abuku dobuka, na si fum bisik dongopnukba, na arye aketibuk buku dipse.

<sup>3</sup>Abuku aripnamanuk talak ara, ayupu tonap dukdongobuka nyapnuk. “Se, anda tukwak mutukunye ulyama anya arye, abuku dobuka diplyame,” nyapnuk. Nyapnuk talak ara, ‘Aning ara kum dipnun do?’ tenepse bukni, aning dobuka dinmase talak ara, mong yung mek to teleb lelamle atonun lepnuke. Na mun fum tam, akunum malbinuk talak ara, boupnuke. Abuku dobuka dipsop ura, mong mek yung teleb lelamle atonun lepnuke.

<sup>4</sup>Winipse talak ara, el Allah arye na ti, tonap tamubuka nyapnuk. “Ninye arye deipkikba, tukwak mutuku ulyamnye, ance an kayapu Israel yala ninye unyak mutuku nirya ara, anyapmakin yupu nirya dobuka, sik ti, ‘Allah arye nyapnuka,’ nyabuka peterepra banamlyame.

<sup>5</sup>Na Allah arye, ‘Yuk pera mutuku ninye ati nyalbinamle’ tenen, kum wibuka dopdeipkine. ‘Anda, Israel ninye dam peterelbinamlam’ tenen, nyapmakina anya arye, aninye ara, ikin yupu, an kum kekepmanto yupu

kum nyanyake. Sikce, nyanamkiyak yupu ara, ance, ‘E, sik nyanyak yupu ara, ‘Deiyok ani’ tenen, kekebuka, kum biknamne,’ kum tenepnamlyame. Sik nyapnamkiyak yupu ara, an yupu koproba anya.

<sup>6</sup>Ati ara, na arye an wipdeipkince, dopdeipnamakin mutuku ara, yupu kekena kum mutuku nang kume. Yuk mutuku yupu nyanyak kili sal kum bukni, an babye nyalyam yupu uk nyanyak ninye unyaka anya arye, na arye nyanamkin yupu bobuka, sik Israel yala ninye ati peterelbinamlyame. Israel yala ninye arye, an nyanalam yupu kum kekenamkiyak bukni, yuk pera mutuku ninye dam dopdeipkitinyop ura, sik yuk mutuku yupu nyanyak nang arye, na yupu moubuka kekeptinge. Bukni, na tenen ninye anya arye, kum kekenamake.

<sup>7</sup>‘Na nyanye yupu kekepnitinge,’ tenenamlam bukni, an kayapu Israel yala ninye ara, an nyanamlam yupu fia kum kekenamkiyake. Ara, talya ati kume. Sikda, na Allah arye nyanye yupu babye, fia kum kekeninyake. Sik Israel ninye nirya ara, kanye tenina kat kibuka anye arye, mandipna kanye bobuka, tat dayuk ninye unyakce, ‘Nun like,’ nyanyaka ati, na yupu babye, kekena kum unyake, nyapkine.” Allah arye Yehezkiel biti, laka nyabuk.

<sup>8</sup>Nyabuk ura, ayupu ton nyapnuk. “Israel ninye, sik kanye ara, fia kat ubukba keil kisok bobuka unyaka anya arye, winitalak ara na arye an ti, ilil una fia kumce, bisina weiknye, akunum kipdeipkine. An babye atonun mandipna ubuka, fil kum batakmantonye una deiyok ning akunum deipkiniba, winibuka ulamince, sik ti fia mikip arye peterenamlyame. Sik mandipna kanye bobuka unyak atonun, ubuka unamlyame. Ilil una kumce, na yupu dobuka peterena uk unamlyame.

<sup>9</sup>Bisibuka winilamak touk, an babye, atonun kipdeipkine. Winibuka wininamlama deiyok ara, sik Israel ninye arye, an yupu yaniptapnamkiyaka ati, ance keil kat bulamla atonun uminyop ura, sikce an ti kum bisipnamkiyake. Ati, sikce lik tenebuka, yu upliba, an ti nyapkikirye, fia malye kanye bonamkiyaka babye, ance, ‘Se, yata wiriptinye do?’ tenen, ilil asa kum unamlyame. Sik Israel yala ninye ara, na ti, ‘Nun like’ tenen, na yupu yanininyak ninye ati nyapkine,” Allah arye, na Yehezkiel ati nyapnuke.

<sup>10</sup>Atalak aniryuk, Allah arye ayupu tonap dukdongobuka nyapnuk. “Se, anda ninye arye deipkikba, tukwaknye ulyame. Ati, anyanamkin yupu nirya ara, an amul arye kekebuka, fia moubuka tenipmince, ‘Se, aning ara, Allah arye nyapnuka,’ tenebuka unalame. Na nyanamkin yupu nirya ara, an kanye noutamak delinamlyame. Fia moubuka akunum talepminyop ura, aminyan sik dam laka nyalbinamlyame. <sup>11</sup>Ati winitalak ara, an yala nang ap, an kayapu Israel yala ninye ap, Babel mutuku yin talin nang arye, sirya obikce, tapu koubuka delilyayikba, Babel mutuku noutamak daunyak mutuku biminca, na arye an ti

nyalinamkin yupu nirya ara, sik kekena ati, peterelbinamlame. Sik ti nyanamlyame. ‘Allah el si Yahweh, aning nirya talibuka deice tam, Weik Erena Deiyouknye ulirye, el tenelul touk ululnye birye, nyapnuk yupu ara, ani,’ nyabuka peterelbinalame. Ara, sikce an yupu kekenamkiyak talak babye, sikce an yupu kum kekebikiry, batakanamkiyak talak babye, peterena uk unamlyame. ‘Kum kekepmaniyak ati, bataknamne,’ fia kum tenenamlyame.” Allah arye, na Yehezkiel na ak nyapnuke.

<sup>12</sup>Nyalongoyuk talak aryuk, Allah el Dib Kanye arye, na dobuka ereipnuke. Winipnuk talak arye, na balye tam arye, yupu weik asa arye ton nyabukce, lelim weik lenmokba kekepse. Nun ni Allah, anda im deice tam ulyam mutuku ara, ei unyak malaikat nirya arye, an si erebikiry, ‘Allah ara, fia teleb uk ulule, nyanamak’ tenen, patanulule.<sup>e</sup> <sup>13</sup>Tonda na arye weik lelim kekenmase ning ara, sik kam un ning nirya arye bol pipdanmekce, lelim weik nyanmok anyak kekepse. Tonda, sik yan serek nirya babye, liman lelim weik arye lelamle atonun, lenmokba kekepse. Winipmanto ara, mutuku lulukna lulukliry lelim weik lelamle atonun nyabukba, kekepse.

<sup>14</sup>Lelim weik kekepse talak ara, Allah el Dib Kanye arye na dobuka, welebinukce, yukak binuka deipnukop ura, adib aryuk Allah Yahweh, el mikip na kanye talima fumak moubuka talipnuke. Winipnuk talak ara, na kanye fun tam ara, ‘Yata deiyouk ati do?’ tenen, na kanye boktopnuke, malye kanye bobuka engepsiry, mitikanun ton teniltona uk tuba upnuk. <sup>15</sup>Aning nirya winipse talak ara, talye karin arye, Babel mutuku yin talin nang arye, Yudea mutuku noutamak ulamik ninye omikce, bobuka delilyanamikba, ulamik mutuku, mek si Kebar mek lilun bobinukba unmase. Tonda amutuku si ara, Tel-Abib mutuku nyalamikak yanuka unmase. Amutuku bobinuka deipnukop ura, daunmasi bukni, amutuku uk like tek barye (7) sum, aninye ap neika ulamupu.

Atalak noutamak ara, mambul ning eipmase ning ap, Allah el Dib Kanye arye bobinmanuk ning nirya ap ati, kanye bona kum, ‘Yata wiripmanil do?’ tenen, teniltona uk unmase. Yupu kum tanmasiry, talya unmase.

**Allah el si Yahweh arye, ‘Anye bira Israel ninye talibuka  
ulamliry kalikinamle’ tenen, Yehezkiel biti wipdeibuk yupu**

<sup>16</sup>Like tek barye (7) sum akunum mapse talak ara, Allah el si Yahweh arye, na ti yupu nyalyanukce, nyapnuke. <sup>17</sup>Allah Yahweh arye nyapnuk yupu ara, ani.

Se, anda ninye arye deipkikba, tukwak mutuku ulyamnye bira, na arye an wipdeipmakina ara, talye ati kume. Na ara an ap neika ansinibuka

---

<sup>e</sup> **3:12** Ton nang, Ibrani yupu kel nang arye nyanyake. Ayat 12 deiyouk ara, ani. ‘Allah im deice ulyamnye, an si uk fia erenamkiyabe nyanmek,’ nyanyake. Bukni, minop talak sekamik Ibrani yupu ara, ikin anye arye, nun mitik walwal usulule.

ulamnimirye, anda Israel yala ninye, sik kalikna deiyoknye unamlame. Ara, na arye, nyapkinnye yupu kekepminyop ura, adib aryuk ayupu dobuka, Israel ninye ati melipmince nyanamlame. Ara, talye yupu ati kuma. Yatato yupu do nirya, wenen ning do, ikin ning do, kanye imun ning do, na arye an ti mambul yupu aripkinnye talak ara, laka nyapkinnyop ura, ance ayupu dobuka, adib aryuk sik Israel ninye ati, laka nyanamlyame.

<sup>18</sup>Mambul yupu nyanalama anya arye, winipmanto ara, na arye malye ulamice ninye ati ara, na arye sik ti, “Malye tuba winiminyop ura, wenebuka opsiniba, dipkoprop dipnamlumca,” nyabuka, wenena yupu deice arye nyanamne. Bukni, ayupu nyapnyop ura, ance amalye un ninye ara, ‘Sik malye unyak ning bataktinge’ tenen, sik ti kum nyapminyop ura, sik malye unmace dib aryuk dibikiba, sik malye una ati wenepnamne. Bukni ance, ‘Allah arye sik malye unyak ninye oplyak’ tenen, ayupu kum nyapminyop ura, an babye wenepnamkine. Sik malye unyak ninye malye kanye bobuka dipnamaka deiyok ara, an nong deice uk deipnamkine. “Sik dipnamaka deiyok ara, an uka,” nyabuka wenepnamkine.

<sup>19</sup>Bukni, sik malye un ninye ati ara, anda moubuka kalikdanamlyame. Amalye unyak ninye ati, “Se, na kayapu, anggunce tuba malye ulamunye ani, Allah arye anggun malye umunya ati, wenebuka opnamsil,” nyabuka, sik ti melibuka peterepmince, wenepminyop ura, teleb uka. Wenepminye bukni, sikce an yupu kum kekebikirye, batakikcop ura, na arye sik ti wenebuka opnamne. ‘Sik malye ning bataktingop ura, kam uk uptinge,’ bukni, kumop ura, dipna uk upnamake.

Winibuka dipnamak bukni, an tonok ara, kam unalame. Ara, urdem ati kume. Na arye nyapkinnye touk, amalye unyak ninye ati, kalikmince, ‘Allah arye opsilyak’ tenen, akunum wenepminyop ura, ayupu nyanamlama deice arye, lyepdanamlame. Ara, na arye, ‘Winipnalame,’ nyalikinye yupu uk kekebuka, unamlama ati ara, kum dipnalame.

<sup>20</sup>Tonda, yata ninye do nirya, diksukumuk ulamikca ani, aning batakikirye, tuba tamubuka malye winin ning uk ubicop ura, na arye, “Aning ara, kum wininamlyame,” nyapdeipkise yupu tuba winipminyop ura, “Dipkoprop wenebuka opnamsine,” nyapne bukni, na yupu batakuka kum kekepnycop ura, sik dipkoprop dipnamake. Bukni, malye ubikiba, na arye nyakinye touk, ance, “Na kayapu, anggun malye ululum ning batakutume. Kumop ura, Allah arye wenebuka opsilyake,” nyabuka, akili sal ati, wenebuka kum peterepminyop ura, sik malye unyak ning noutamak arye, talye kanye bobuka dipnamake. Sik malye wininyak ning dekna ati dipnamak bukni, ance, “Aning batakululume,” kum nyapminyop ura, sik dipnamak ara, an nong deice deipnamkine.

Tonda, minop talak sikce teleb winin ning, winilamik ning ara, tuba tamubuka tonap, fia kum tenenamne. Aning deice arye, sikce sik

bidamnya ati, kum melipdatinge. Bukni, ance amalye unyak ninye ati, ‘Allah arye wenebuka opsilyak’ tenen, dipnilibuka, wenena yupu kum nyapminyop ura, sik dipnamak ninye ining saknamle ning ara, an nong deice uk upnamkilara. Winibuka wenepnamkin ati, batakana kum dib aryuk, Israel ninye ati, fia wenebuka peterenamlyame.

<sup>21</sup>Bukni, ance malye unyak ninye ati ara, ‘Sikda tonap malye winibicak’ tenen, ance moubuka dipnilibuka, wenenamlyame. Winipminba, ayupu kekebikirye, sik malye un ning nirya batakicop ura, aninye dipkoprop, kam uk ton tuba unamake. Ara, na arye nyapdeipne yupu kekebikca deice arye, fia kam unamake. Ton ning ara, anda kam uk unalame. Ara, urdem ati kume. Deiyok ara, na arye nyapkinye touk, ayupu nyanamlama deice arye, lyepdanalame. Ara, na arye, “Winipnalame,” nyalikinye touk, winipminyop ura, kum dipnalame. Allah arye, Yehezkiel biti nyabuk.

**Allah arye Yehezkiel bobuka, ninye kum mutuku,  
weik lyu ak dopdeibukba, luba dayuk yupu**

<sup>22</sup>Yehezkiel birye nyabuk. Atalak ara, Allah el si Yahweh arye, el mikip na talima ak daraptalepnuke. Winipnuk talak ara, nyapnuke. “Ati ara, an bukmince, otam mutuku ara, lyu weik ubuk mutuku bilyame. Winipminyop ura, na arye mambul yupu ton nyapnamakine.” Allah arye nyapnuke. <sup>23</sup>Nyapnukop ura, bukdogsirye el nyanmanuk mutuku, weik lyu mutuku binuka dinmasibuk, dipkoprop Allah Yahweh el dirina ara, fia weik upmokba eipse. Ara, na Kebar mek lelun unmase talak wamuk touk dirina weik upmokba eipsirye, el si erena ati, ‘Talye luprabuka, kum dipdenun’ tenen, na urasin nirya kanupdongobuka, tuku deice mapse.

<sup>24</sup>Winipse bukni, atalak ara, Allah el Dib Kanye na talimak wekelyanukce, mikip ubuka tikeipnuke. Tikeipnuk talak ara, elce na ti nyapnuk yupu ara ani. “An mutuku koproba uk tamubuka biminca, an aik fum tam uk, bublan tirikdongobuka, unalame. Talye lubprabuka bai tam balsusana kume,” nyapnuk. <sup>25</sup>Tonda elce nyapnuk yupu ara ani.

Se anda tukwak ninye arye deipkinye bira, yu nang arye, an tongobuka tapu koupnamkiyake. Koupkicop ura, ance ton kupsakuka yuk ninye dam ton kum banamlame. Anyaik fum tam uk fia unamlame.

<sup>26</sup>Tonda, ance Allah el yupu yaniltan ninye noutamak unamlama ati, na im deice arye, luptalina deiyok ning, an sitang deice deipkiniba, luba talipnamkile. Luba talipkilyop ura, yupu ton fia kum tanamlame. An sitang ara, an si bam bol fum bisik deice tam ara, denepdongopkiliba, yupu tapmanto kum unamkile. Ara, talye ati kume. Israel ninye arye, malye ulamice ning ati, ance “Winina meme,” nyabuka, ‘Wenena yupu ton nyapminca, sik malye unyak ning bataknamak’ tenen, ‘Na Allah ati moropniminyak’ tenen, luba talin ning arepkiniba, yupu tapmanto kum unalame. Sik Israel yala ninye ara, na yupu yanibuka, malye kininyakce, mandipna kanye bona weik ninye unyaka atia.

<sup>27</sup>Winipnamkil bukni, yuk talak ara, na arye yupu nyana deiyok ning tuba tonap arepkiniba, tamubuka yupu nyaminyop ura, na arye mambul yupu ton arepkiniba, ance awenena yupu dobuka, sik Israel ninye ati nyanamlyame. Sik ti nyanamlame.

Allah el si Yahweh, aning-aning nirya deice tam talibuka, Weik Erena Dei yoknye ulula anya arye, elce, ‘Winipnamne,’ tenelul touk winilule. ‘Anye birye nyapnuk yupu ara, atia,’ nyabuka, peterenamlyame.

Ayupu nyanamlam bukni, sik Israel yala ninye nirya ara, fia malye tenebuka, kanye talima Kat nang ukirye, na yupu yaniltakan ninye uk unyake. Ati, ton tam ninye ara, ance nyanamlam yupu moubuka kekenamake.

Bukni, ton tam nang ara, na Allah arye nyapdeipkiniba nyanalam yupu moubuka kum kekenamkiyake. Winibicop ura, ance, ‘Anggun mandipna kanye boubuka ninye yupu kum kekeluluma ara bataklulume. Allah el yupu kekeplulume,’ an mikip asa arye, nyana kume. Sik kanye aryuk tenebikirye wininamake ara, sik bidamnye daunamake. Sikda ninye yupu kekena kum unyaka anya arye, dawininamake. Na Allah arye, an Yehezkiel ati nyapkine. Allah arye nyapnuk.

*[Minop talak sekik buku noutamak ara, pasal 4 sampai 17 ton aubuk bukni, nunce aning kum sekupu. Ati ara, otam pasaluk 18 dukdongobuka nyapra banamlulume.]*

**“Diksukumuk ubuka, malye ton kum unyak ninye ara, kam unamak bukni, malye uk wininyak nang ara dipnamake,” nyabuk yupu**

**18** <sup>1</sup>Ara, Allah el si Yahweh arye, na Yehezkiel biti nyapnuke. <sup>2</sup>Sik Israel yala ninye ara, sik mining yala nang ati tenebikirye, yata ati, sikce tuba-tuba adomon yupu nyanyak do? Minop talak arye diprongobuka, wini babye tuba nyanyak domon yupu ara, ani. ‘Sik ni yapu wisi nang ara, anggur tapu duk yung ning dibikcop ura, aminyan talak ara, sikce deibikiba, dadeipdanin bakirye unamak mapu babye, sik si bam bol fum bisik ara, matang tuba lenamle,’ nyanyake. Yata deiyok ati adomon yupu tuba nyanyak do?

<sup>3</sup>Ati ara, na Allah tuba kam uk ununye anya arye, na ara Allah Yahweh unune. Aning-aning talibuka deice tam, Weik Erenanye unune. Unirye na tenepnye touk wininune. Ati, na arye nyalinamkin yupu ara, dipkoprop nong upnamle. Minop talak nyalamik domon yupu ara, anggun winitalak ululum Israel ninye arye, tuba kum nyanamlulume, nyapsine. <sup>4</sup>Dipkoprop na nyasinye yupu ara, moubuka kekepmunce, biklulume. Ninye nong ap, ninye kam una ap nirya ara, na arye tenenun ning uk unyake. Wisi nang babye, sikce deipmakce mapu, mitik mapu nirya babye, na tenen ning uk unyake. Tonda, malye upmace ninye tonok ara, dipnamake, yuk ninye ton kume.

<sup>5</sup>Dipkoprop nyapsine. Yatanye do nirya, ninye tonoknye birye, dipkoprop fia diksukumuk ululnye bira, na Allah arye, ‘Aning

wininamlulume, aning kum wininamlume,' nyanye yupu ap, fia teleb ubuka un ning uk, wininlulnye bira, kam unamle. <sup>6</sup>Aning atonun ning winilulnye bira, el winilul ning ara ani. Diksukum ululnye bira, Isa Mututku Dongonye si erenmakiry e opmace basam tup kum talilule. Tonda, amutuku unyak Israel ninye arye, 'Nun ni yapu ukiry e melinamsiyak' tenen, si erenyak isa ap, ninye urasin atonun ubuka memebikiry e, si erenyak ning ap ati, el asing kum dililiry e, 'Aning ara, na ti melinamnile,' kum tenelule. Tonda, anye bira, yuk nang sik domikce kilapu ati, yupu moupdeibuka, 'Na ap mapnaname,' nyabuka, malye kum ulilule. Tonda, yuk kilapu babye, el domlye kil babye, ining balamlye talak, sik dam kum balule. Atonye bira, teleb un ning uk ulule, nyapne.

<sup>7</sup>Tonda yuk nang arye, el yo bok do, yuk ning do, tia talak ati doprobikiry e, dabolamica talak ara, elce sik nong deice, ikin ning ton kum delilule. Yuk nang ati, ikin fil kum dilule. Tia talak ati, el ning doprobikiry e, 'Aminyan talak ara, dipkoprop aning tamubuka aripnamniak ca, tenepnamsil' tenen, el bona ning pununa ati, aryamikce ning ara, ateleb ululnye birye, ubula kum dololule. Sikce el ning tia talak ati dopromice ning, tamubuka aribicop ura, elce sik ning tia talak ati, dadeiyamlye ning dobuka, adib aryuk tamubuka arilule. Tonda, ateleb ululnye bira, yuk nang ning talye ubula kum dololule. Tonda, yuk nang din pataplibub, elce melibuka arilule. Yuk nang ton, butum aling kum ati, nong banang ulamice ninye ati, melibuka arilule. Atonye bira, fia telebnye ulule.

<sup>8</sup>Tonda, teleb ululnye birye, yuk ninye sik patana ati, uang yo bok areplye talak ara, elce aning kum laka nyalule. "Na yo bok dopropmunce, na ti tamubuka min kum arepmanumunye talak noutamak ara, uang yo bok ton tabakuka nyapnamasin touk, yo bok ton tabakuka aripnamnulume. Anggunce, na ning dopromnumunye ning uk kume. Na ara, weik tonap dolona ati, weik tabakalona ati, uang yo bok ton tabakuka weik arye arenamnulume," fia kum nyalule. Tonda, anye birye, 'Malye un ning winipnyak' tenen, kalikdaliry e, malye kum ulule. Atonun anye birye, yupu bokolina deiyoknye ulul talak ara, ton tam nang arye, ton tam nang ati, "Winibuka malye upmasiyake," nyabice ning ara, moubuka kekepliry e, dipkoprop yupu uk sik ti lipsisikuka bokolilule. Tilila yupu nyana kumce, teleb yupu uk nyalule.

<sup>9</sup>Tonda, na Allah arye, sik Israel ninye ati, 'Aning wininamlulume, aning ara kum wininamlume,' nyapdeiyamse yupu ara, moubuka kekelule. Na arye nyanun yupu nirya ara, moubuka teneliry e, talibuka fil dolule. Tonok ning babye, kum batakalule. Elce, 'Winipnamne,' nyalul touk, aning uk dipkoprop winilule. Tenepce arye tilila yupu ton, kum nyalule. Ato winilulnye bira, dipkoprop kam fia unamle, nyapsine. Allah arye aning-aning nirya talibuka, deice tam Weik Erena Deiyoknye uliry e, 'Winipnamne,' tenelul touk, winilulnye birye nyabuk.

<sup>10</sup>Bukni, tonoknye birye deipnamle mi tonok ara, ninye yupu kekena kum uplirye, yupu bisibuka ninye opliba, sik ining balyop ura, amalye uplinya bira, dipkoprop dipnamlarya nyapne. <sup>11</sup>Anye birye, malye ulul ning ara, ani. Diksukum kum winilul bukni, elda, isa si erekirye, opmace basam tup dilule. Tonda elce aisa ati, ‘Na ni yapu unyakce melinamniyak’ tenen, aisa si erelule. Tonda, anye birye yuk nang, sik domikce kilapu ati, yupu moupdeibuka, ‘Na ap maptininye,’ nyabuka, akil yoplyop ura, malye ululule. Atonye bira, el li teleb ulamlinye mi bukni, el tonok ara malye uk ulule, nyapne.

<sup>12</sup>Tonda, yuk bona utotoa talina kum nang arye, anye bira el yo bok do, yuk ning do, tia talak ati doprobikirye, sik patan ning dekuka doprobikirye, dabolamica talak ara, elce sik nong deice ikin ning weik delilule. Tonda yuk nang ati, ikin fil arukulule. Tia talak ati, el ning doprobikirye, ‘Aminyan talak ara, dipkoprop aning tamubuka aripnamniakce, tenepnamsil’ tenen, el ning dekna pununa ati, aryamice ning ara, amalye ululnye birye, ubula dololule. Sikce el ning, tia talak ati dopromice ning, tuba tamubuka aribicop ura, elce sik ning tamubuka kum arilule.

Tonda, amalye ululnye bira, yuk nang, sik ning talye ubula dololule. Tonda, yuk nang din patana ap, butum aling kum ati, nong banang una ap, ulamice talak ara, elce melibuka kum arilule. Tonda, anye birye amutuku unyak Israel ninye arye, Isa Mututku Dongonye si erebikirye, ‘Nun ni yapu ukirye, melinamsiyak’ tenen, aisa urasin atonun ubuka memamice ning ati, el asing dilamlirye, ‘Aning ara, na ti melinamnile,’ tenelule. Atonye bira, fia malye weik ulule. Ati, na Allah arye, ‘Aning ara na fia like,’ tenenun ning uk, winilule.

<sup>13</sup>Tonda, amalye ululnye birye, yuk ninye sik patana ati, uang yo bok areplye talak ara, elce ayupu uk nyalule. “Na uang yo bok dopropmunce, na ti tamubuka min kum arepmanumunye talak noutamak ara, ‘Yo bok ton tabakuka aripnamnulume,’ nyapnamsin touk, uang yo bok tonap tabakuka weik arye aripnamnulume. Anggunce na yo bok dopropnulume touk kume. Na ara, weik arye tonap tabakuka dolona ati, weik arye arenamnulume,” nyalule.

Aning ati ara, amalye wininanye kam fia unamle do? Kume, dipkoprop kam fia kum unamle. Na Allah arye, ‘Aning nirya ara, na fia like,’ tenenune. ‘Aning nirya ara fia malye,’ tenenirye, anggun ti, ‘Winina meme,’ nyapdeiyamsise ning ara, elce talye mangkau kibuka winilula anye arye, anye bira dipkoprop wenebuka opnyop ura, dipnamlarya. Diplyop ura, el ining ara, el kisok deice upnamle. El ining ara, el bidamnye nong deice uk paleplirye banamle. El malye ulula deice arye, wenebuka opnamna anye arye, el dipna deiyok ara, el bidamnye arya.

<sup>14</sup>Tonda, winipmanto ning ton, nyapnusine. Yatanye do nirya, el li yapu arye malye ulamik ning, kel biklirye, moubuka teniplyop ura, ‘Kume,

amalye un ning nirya ara, na dipkoprop kum wininamne,' teneplirye, diksukumuk ulyop ura, anye bira dipkoprop, kam fia unamle. <sup>15</sup>Atonye birye, diksukumuk ulula anye arye, elda, Isa Mututku Dongonye si erebikirye, opmace basam tup kum dilule. Tonda elce amutuku unyak Israel ninye arye, 'Nun ni yapu unyakce, melinamsiyak' tenen, si erenyak Isa Mututku Dongonye ap, aisa urasin atonun memelinyak ning ap ati, el asing kum dilirye, 'Aning ara, na ti melinamnile' tenen, diba kum tenelule. Tonda, anye birye yuk nang sik domikce kilapu ati, yupu moupdeiplirye, 'Na ap mapnaname,' nyabuka, malye kum ulilule. Atonye bira, fia teleb uk ulule, nyapne.

<sup>16</sup>Tonda, anye birye yuk ninye nirya ati, malye kum ulilule. Atonun, yuk nang arye, el uang yo bok do, yuk ning do, tia talak ati doprobikirye, dabolamica talak ara, elce sik ti ayupu kum nyalule. "Aminyan talak, 'Dipkoprop aning tamubuka aripnamniak' tenen, na ning dekna pununa ati, anggun mambul ning aripnululume. Kumop ura, na ning tia ati, kum doproptume." Aning kum nyalul bukni, sik ning dolona kum dib aryuk, yuk nang sik patan ning ati, talye mangkau kibuka melilule. Ateleb ululnye birye, ubula kum dololule. Tonda, yuk nang din patapliba, elce melibuka arilule. Yuk nang ara, butum aling kum ati nong banang ulamice ninye ati, melibuka arilule. Atonye bira, teleb winilulnye ulule nyapne.

<sup>17</sup>Tonda, ateleb ululnye birye, 'Malye ton winipnyak' tenen, fia moubuka kalikdalirye, malye ning tonok ning babye, kum winilule. Tonda, yuk ninye sik patana ati, uang yo bok areplye talak ara, elce aning kum nyalule. "Na yo bok dopropmunce, na ti tamubuka min kum arepmanumunye talak noutamak ara, 'Yo bok tonap tabakuka aripnamnulume,' nyapnamsin touk, uang yo bok ton tabakuka aripnamnulume. Anggunce na ning dopropnulum ning atonun kume. Na ara, uang yo bok weik arye tonap tabakuka arenamnulume," fia kum nyalule.

Tonda, na Allah arye anggun Israel ninye ati, 'Aning wininamlulume, aning ara kum wininamlume,' nyapdeiyamsise yupu ara, moubuka kekelullume. Na arye nyanun yupu nirya ara, moubuka tenemunce, talibuka fil dolulume. Tonok ning babye, kum batakululume. Ato ululnye bira, el li yapu arye, malye ulamika deiyok ati ara, dipkoprop kum wenepnamna anye arye, kum dipnamle. Elda dipkoprop kam fia unamle. Ati ara, anggun babye, atonun winibuka wininamlulume.

<sup>18</sup>Bukni, yatanye do ninye nirya, el li koprop arye tilila yupu nyalamuk ning ap, yuk nang ikin ulamik talak, sik yo bok tabakuka, ubula arye dololamuk ning ap, el kayapu nang, sik ning ubula dololamuk ning ap, el yala ninye noutamak, yuk malye un ning ayala-yala nirya, winilamuk ning nirya ap ati ara, adeiyok ati dipnamlarya. Anye bira, elcuk malye

ulamlya deice arye, wenebuka opnyop ura, dipnamlarya. Ara, urdem ati kume, deiyok ara, el malye ulamuka atia. Na Allah arye nyapsine, nyabuk.

<sup>19</sup>Na arye nyapsine. Sik malye unyak nang ara, sik malye unyaka deice aryuk dipnamake. Bukni, anggun Israel ninye arye na ti nyanululum ning ara, yuke. Anggunce nyanululume. ‘Malye ulamline birye, el mi deiplyop ura, el li biti wenenamle touk, elce deiplye mi babye, wenepnamlyame,’ nyanululume. Bukni, na Allah arye aning atonun kum nyasunune. Yatanye do nirya, diksukumuk uplirye, na Allah arye sik ti, ‘Aning wininamlulume, aning ara, kum wininamlume,’ nyapdeiyamse yupu, moubuka kekeplirye, teleb ulyop ura, anye bira dipkoprop kam fia unamle. Deiyok ara, elda el li koprop, malye ulamuk touk, kum winilule. Malye ulamline birye, el mi deiplyop ura, el mi ara, malye ning una kumce, diksukum koprop ning uk winilula deice arye, kam fia unamle, nyapsine.

<sup>20</sup>Bukni, yatanye do nirya, ninye ton malye winin ning uk, weik winiplinye bira, wenebuka opnyop ura, dipna uk upnamle. Tonda sik ni yapu ap, sik nin yapu ap, malye ulamikibuk, sik mapu teleb ulamicop ura, sik ni yapu ap, sik nin yapu ap, mince malye ulamikce ning ati, sik mapu ara, kum wenepnamne. Winipniba, sik kum dipnamake. Atouk, yatanye do, yata kil do, sikce deibice mapu, malye ubicop ura, amalye una dekna ati, sik ni yapu ap, sik nin yapu ap ati, kum wenepnamne. Sik mapu malye unyak ning ati ara, sik ni ap, sik nin ap ara, kum dipnamake. Aning kum bukni, na arye dipkoprop nyapsine. Diksukumuk unamak nang ara, sik teleb un ning, sik deice uk unamle. Atouk, malye uk unyak nang ara, sik malye wininyak ning ara, sik deice uk unamle. Ninye nirya winilamikce touk, eipnirye, yupu lipsisikuka bokeipnamsine. Na Allah arye nyapne.

<sup>21</sup>Bukni, sik malye uk unyak nang arye, ‘Se aning ara, malye ulula ati, bataknyap’ tenen, bikikirye, sik malye un ning batakikirye, diksukumuk ubicop ura, kam fia unamake. Ara, na Allah arye nyapdeiamsise touk, ‘Aning wininamlulume, aning, kum wininamlulume’ nyabuka, nyapdeiyamse yupu talibikirye, dipkoprop teleb un ning uk, winibicop ura, aning ara na eipnirye, yupu bokeipnamsine. Malye ulamik ning batakikce, diksukumuk unyak ninye ara, kum wenepnamne. Sikda kam fia unamake. <sup>22</sup>Min yuma arye malye ning ayala-ayala nirya winilamik ning, batakikirye, diksukumuk ubicop ura, min arye malye winilamik ning deice ati, yupu lipsisikuka kum bokeipnamne. Sik malye ning akunum dipkoprop batakikcop ura, aning tuba kum tenenamne. Aning kum bukni, sik diksukumuk unamaka deice arye, kam fia unamake.

<sup>23</sup>Tonda el malye ning uk ulamlye dib aryuk diplirye biti, na Allah arye kanye deilinun do? Kume, malye wininyak ninye dibicop ura, na

kanye kum delinune. Aning ara, 'Se sik bicoe,' tenenune. Kume, na arye tenenun ara ani. 'Sik malye unyak ninye nirya ara, sik malye ning bataktingce, dipkoprop fia diksukumuk ubicop ura, kam ulamtinge,' tenenune. Na ara Allah Yahweh, aning-aning nirya talibuka deice tam Weik Erena Deiyoknye uniry, 'Winipnamne,' tenepnye touk ununa anya arye, na nyanye yupu nong dipkoprop ulule. Na ara, Weik Erenanye birye nyapsine.

<sup>24</sup>Bukni, ninye ton teleb ning uk, winipnin balamlya ani, aminyan talak ara, aning nirya batakuka, malye uk uplyop ura, kam fia unamle do? Kume, elce diksukum ning uk, ulamlye bukni, aning nirya bataklirye, elda fia malye-malye uk, unyak ninye winilamak touk, fia winiplinye bira, dipkoprop kam unamle do? Kume, elda kam kum unamle. Teleb ulamlye bukni, tuba tamubuka, malye winin ning uk deiyok kouplirye, tabakuka weik arye, malye upnin balyop ura, min arye teleb winilamak ning ara, tuba kum tenenamne. Aning kum bukni, malye-malye un ning, yala-yala weik upnin balye ning ap, na ti, 'Se, na ni koproba, an amutam uk fia unamkine,' nyapnuk bukni, batakniyle ning ap ati, wenebuka opnyop ura, dipnamle.

<sup>25</sup>Aning-aning nirya ara, laka nyapmasinba, anggunce na ti, 'Se, Allah arye winisilye ning ap, yupu bokolisulul ning ap ara, dipsukum kum ulula ati ara, nun like,' nyanululume. Winibuka nyanululum bukni, anggun Israel yala ninye ati, na arye nyapsine. Na ara, malye un ning tonok babye, kum wininune. Diksukumuk unune. Ati, malye ululum ninye ara, anggun tia! Se, anggun Israel ninye ara, yuk nang ati, diksukum ubuka yupu kum bokolilulume. <sup>26</sup>Arup arye akunum nyapmasin touk, ninye ton teleb ubuka ululnye bukni, aning batakuka, tuba tamubuka malye winin ning uk talibuka ulyop ura, adeice arye dipnamle. Ara, urdem ati kume. Deiyok ara tuba malye un ning uk winilula anya arye, adib aryuk dipnamle, nyapsine.

<sup>27</sup>Bukni, ninye ton malye ulamlye bukni, aning batakuka tuba tamubuka, 'Se, na malye ununa ara, batakneba, Allah arye lyepnutue' tenen, el malye winin ning, batakuka dib teneplirye, diksukumuk ulyop ura, el nong, el dib kanye nirya, teleb ubuka fia kam uk unamle. <sup>28</sup>Ara, urdem ati kum nyapsine. Deiyok ara, el malye ulamlye ning nirya bataklirye, dib teneplyop ura, yuk talak babye, fia diksukumuk unamle anya arye, anye bira kum dipnamle. El malye winin ning batakuka, teleb winin ning uk, wininamle deice arye, kam fia unamle.

<sup>29</sup>Aning nirya ara, na arye anggun Israel ninye ati, laka nyanusun bukni, anggun Israel yala nang arye, na ti nyanululume. 'Se, Allah arye nyanululul yupu ap, yupu bokolisulul ning ap ara, nun like. Aning ara, diksukum una kume, tenenyabe,' nyabuka, malye nyanululume. Nyanululum bukni, na arye nyapsine. Na ara, malye winin ning tonok

ning babye kum wininune. Fia diksukumuk unune. Malye ululum ninye ara, anggun tia! Se, anggun Israel ninye ara, yuk nang ati, diksukum ubuka yupu kum bokolilulume.

<sup>30</sup>Ati ara, na Allah Yahweh, aning nirya talibuka, deice tam Weik Erena Deiyoknye uninye birye, ‘Winipnamne,’ tenepnye touk, wininuna anya arye, na arye nyapsine. Se, anggun Israel yala ninye nirya ati, na arye yupu bokdeipsinirye, wenepnamsine. Na arye dipdesinirye, anggun malye ulamunye ning aupmasilye touk, wenepnamsine. Diksukumuk ulamunye ning aupmasilye touk, teleb kipdeipnamsine. Yatanye do, yata kil do nirya, anggun ulamunye touk, yupu bokeipnamsine. Anggunda, ‘Se nun malye wininyap ning deice arye wenepsilirye, opsilyak’ tenen, anggun malye ululum ning nirya ara, batakmunce, aminyan tamubuka yuk teleb bisik uk binamlulume. Winipmanto ning ara, keil yan dum duklirye opsilyop ura, kote saklamak atonun, anggun malye ululum ning dekna ati, ‘Wenepsinirye, opsinyak’ tenen, nyapsine.

<sup>31</sup>Ati ara, se anggun Israel yala nango. Anggun malye umunye ning nirya batakmunce, ‘Allah arye nun kanye ap, talima ap, winiryuk ning aripsutue’ tenen, na ti moronamnulume. Winibuka morolamnumunyop ura, winiryuk kanye ap, talima ap, punubuka aripsinyop ura, kam fia uptume. Kumop ura, yata deiyok ati, ‘Dawaple, nun dipna babye, teleb uka,’ tenelulum do? Anggun Israel yala ninye, dipna ara, na like, nyapsine.

<sup>32</sup>Ayupu nyapmasina ara, urdem ati kume. Na ara, Allah Yahweh, aning-aning nirya tenepnye touk wininune. Na ara, Weik Erena Deiyoknye uniryne, ‘Winipnamne,’ tenepnye touk, wininune anya arye, na arye nyapsine. Yatanye do, yata kil do? Tukwak mutuku ninye malye ulamice ati, wenebuka opneba, dibicop ura, aning ati na kanye kum delinune. Aning ara, na like. Teleb ning ara, tukwak ninye nirya arye, sik malye unyak ning bataktingirye, diksukumuk utingop ura, kam fia unamtinge. Aning atouk, anggun Israel ninye babye, anggun malye umunye ning batakmunce, diksukumuk upmunyop ura, kum dipnamlume. Kam fia unamlume. Na Allah Yahweh, im deice tam erebuka uninye birye, ayupu nyapdeipsine.

*[Minop talak sekamik buku ara, pasal 19 sampai pasal 35 ton awamuk bukni, aning nirya kum sekupu. Ati ara, otam pasal 36 dukdongobuka nyapnin banamlulume.]*

**“Allah arye Israel ninye ati, meliplirye teleb ulinamle,” nyabuk yupu**

**36** <sup>1</sup>Allah el si Yahweh arye nabi Yehezkiel binyak nyabuk. Se, anda ninye koproba arye deiamkiknye ulyame. Ati na arye nyapkin yupu kekepmince, ance sik Israel ninye unyak mutuku nirya, sik dam nyalbinamlyame. Nyalbiminyop ura, sikce na Allah Yahweh aning-aning nirya talibuka, deice tam Weik Erena Deiyok ununye, na yupu uk

kekebuka unamake. <sup>2</sup>Amutuku dana-dana tam unyak nang nirya yakiryé, anggun Israel yala ninye nirya ati, yep-yep asinyake. Sikce nyanyake, 'Kume, nunce Israel yala ninye obuka sirya dakuburye, minop talak sik talibuka ulamik mutuku nirya ara, akunum alubuka dopromupua ati, winitalak ara nun cuk, amutuku noutamak nirya talibuka unyabe,' nyabuka aku tusinyake.

<sup>3</sup>Ati ara, an Yehezkiel birye, na nyapkise yupu dobuka, aminyan winipnamle ning ati, laka lyalbinamlyame. Ara ani. Se, Allah Yahweh aning-aning nirya talibuka, deice tam Weik Erena Deiyok ulunye birye nyapsile. Sik dana-dana tam ulamik ninye arye, sik Israel yala ninye ati, batakna fia kumce, tuba-tuba olyangalamikke, anggun talilamlum ning dalubuka dololamikce, anggun talilamlum ning nirya, malye kililamikce, anggun Israel yala nang ulamlum mutuku ap, asik nirya ap, dalubuka dololamik. Winilamsikba, yuk mutuku unyak ninye nirya arye, anggun Israel kili sal ati, akutusinyakce, malye yupu ap, minina yupu ap, anggun ti nyalamik touk, tuba nyanyake.

<sup>4</sup>Ati ara, na Allah Yahweh, aning-aning nirya talibuka, deice tam Weik Erena Deiyoknye birye, anggun Israel yala ninye mutuku-mutuku nirya ulalumak ati, nyapsine. Winitalak ara, mutuku bukamukak ap, mutuku kon nirya ap, mek obuka balulak nirya ap, lu mutuku ap, asik domikke ulamika ani, ninye yuk nang yayikke, obuka sirya dakikba, asik oldem batakamik asik nirya ap ara, yuk mutuku nang arye, yanuka alapdopsike. Anggun talilamlum ning nirya, dalubuka dololamsikba, yuk ninye nirya arye, anggun ti aku tubuka nalilamsike.

<sup>5</sup>Ati na Allah Yahweh, aning-aning nirya talibuka deice tam, Weik Erena Deiyoknye birye nyapnusin yupu kekeplulume. Ara, na weik arye yu upniliba, sik Israel mutuku dana-dana unyak ninye nirya ap, tonda Edom mutuku unyak ninye nirya ap, anggun nirya ati, yu kanye bobuka nyapsine. Ara, anggun nirya wenebuka opnamsine. Derebuka opnamana deiyok ara ani. Amutuku ninye nirya ap, Edom mutuku ninye ap arye, 'Israel yala ninye talinyak mutuku nirya ara, maning teleb ubuka palamle mutuku anya arye, nun kambing ap, nun domba ap arye, aning dinamaka ati, sik Israel ninye malye kibuka obibyop ura, nun cuk amutuku nirya dobuka talipnamabe' tenen, kanye deiamikke, yupu sirikamika ani, Israel ninye talyamik mutuku, dalubuka dopromik.

<sup>6</sup>Winilamika ati, anda nabi Yehezkiel birye, nyapnamlyame.

Anggun moubuka kekeplulume. Israel yala ninye ulamik mutuku bukamukak ap, mutuku kon nirya ap, mek obuka balulak nirya ap, lyu mutuku ap, asik domikke, ninye daulamika ani, yuk nang arye obuka sirya dakikba, asik oldem wamuk asik nirya ap ara, yuk mutuku nang arye, yanuka alapdopsik bukni, Allah Yahweh aning-aning nirya, talibuka deice tam Weik Erena Deiyoknye ulunye birye, el tenelye touk, dipkoprop winilule. Allah arye nyapmasile.

“Sik ulamikak dana-dana tam unyak kili sal, yuk mutuku ninye nirya arye, anggun talilamlum ning nirya, dalubuka dopromsikce, anggun ti nalisinyak ati, na Allah arye amutuku ninye nirya ati, weik arye yu upniliba, wenebuka oplopnamne.

<sup>7</sup>Aning ara talye ati kum nyapsine. Na Allah Yahweh unune. Na ara aning-aning nirya talibuka, deice tam Weik Erena Deiyouknye ununye birye, na tenenye touk, dipkoprop ununa anya arye, weik erenanye unune. Ati ara, na Allah Yahweh si deice arye nyapsine. Israel kili sal sik unyak mutuku dana-dana tam unyak ninye ara, wenebuka oplopneba, yuk mutuku nang nirya arye, sik ti nalibikirye, malya yupu nyabuka, yep-yep anamake.” Allah arye nyapmasile.

**“Allah el si Yahweh arye, sik Israel ninye unyak mutuku ati, teleb ulinamle,” nyabuk yupu**

<sup>8</sup>Bukni, anggun Israel yala ninye ati ara, teleb daulamunya ani, aminyan talak na melipsinya deice arye, anggun mutuku koproba tamubuka yan unamlume. Ati ara, amutuku noutamak ulul mutuku ap, mutuku kon ap, lyu mutuku nirya ap, tonda anggun yo ap, tapu ap aning-aning nirya ara, bongobuka paplirye, kwapu youbuka, duk fia weik moupnamle. Wininamla deiyok ara, ani. Na ninye Israel yala ninye nirya ara, tamubuka yakirye, amutuku noutamak uk unamak ati nyapne. <sup>9</sup>Se, Israel ninye unamak mutuku nirya ara, fia moubuka tenenune. Israel ninye unamak mutuku tuku nirya ara, dipkoprop na melipnamna deice arye, ninye arye atuku nirya palibuka, sice kiplobikirye yala ning, aning-aning nirya, teleb kibuka dokonamake.

<sup>10</sup>Tonda na mapu koproba Israel yala ninye ati, na arye melipniba, sik yupa tonap, fia weik kibuka tapakra banamake. Ninye yupa weik akunum kipdeipniba, sik amutuku weik kibuka ulamikce, aik daklomikba asik oldem ubuka bipla pamukak nirya ara, ila tuba tamubuka aik dobuka unamake.

<sup>11</sup>Amutuku-mutuku nirye ap, amutuku kon ap, noutamak nirya ara, ninye weik yanuka unamake. Tonda, sikce weinamak kam un ning, ayala-ayala nirya ara, na arye tonap tabakuka aripneba, fia weik upra banamle. Winipniba, ninye ap, sikce weinamak ning ap, fia weik upra banamake. Minop talak mitik teleb ulamlum bukni, aminyan talak ara, aning atonun bukni, weik tonap fia teleb upra banamlume. Ara, ninye arye mapu deibikiba, weik upra banamake. Aning atonun sikce weinamak ning babye, fia tabakuka aripribaniba, weik upra banamake. Aning nirya akunum winipnyop ura, ninye yuk nang nirya arye kel kibikirye, ‘Se, sik Ni Koproba Allah, el si Yahweh ara, dipkopropnye ulule’ tenen, kel biknamniyake.

<sup>12</sup>Na mapu koproba Israel ninye, ayala-ayala nirya ara, anggunda anggun minop talak ulamlum mutuku ila tuba tamubuka bobinamsine.

Winipsinyop ura, anggunce amutuku noutamak uk, talibuka unamlume. Unamlum talak noutamak nirya ara, anggunce delinamlum mapu nirya babye, din patana deice arye, ton fia kum dibinamake. Tonda yuk mutuku ninye arye, anggun mapu kum onamake. Amutuku aripsinyop ura, fia teleb uk ubuka unamlume.

<sup>13</sup>Na Allah Yahweh<sup>f</sup> aning-aning nirya talibuka, deice tam Weik Erena Deiyoknye ununye birye, na tenenye touk dipkoprop wininunye birye, nyapsine. Yuk mutuku ninye arye, Israel yala ninye ulamik mutuku ati nyanyake. ‘Kume, amutuku noutamak unyak Israel ninye ara, dibina uk unyake. Aning atonun olana ap, ikin kanye bobuka una ap deice arye, amutuku noutamak ara, ninye dibina weik mutuku ulule. Israel ninye amutuku noutamak unyak talak ara, dipnin bakibuk, ninye yupa fia mitiktonun uk kipri balulule,’ nyabuka, malye yupu nyanyake.

<sup>14</sup>Winibuka nyannyaka ati ara, na Allah Yahweh aning-aning nirya talibuka deice tam ununye birye tenenye touk, na arye nyapsine. Winitalak arye dipdongobuka, doryanamle talak noutamak nirya ara, sal do, kilapu do, mapu kil mapu do nirya, din patana ap, olana ap, ikin kanye bouna ap deice arye, Israel ninye kum dipnamake. Aminyan talak babye, fia kum kum danamake. Na si Allah Yahweh aning-aning nirya deice tam, Weik Erena Deiyok ununye birye nyapsine.

<sup>15</sup>Winitalak arye dipdongobuka doryanamle talak noutamak nirya ara, sik yuk mutuku nang arye, amutuku unamlum ninye ati, aku tubuka kum yep-yep anamsiyake. Yuk mutuku ninye arye, ‘Se, sik Israel ninye ap, sik unyak mutuku ap ara, talya mutuku uk ulule,’ nyabuka kum nalinamsiake. Atonun yupu tuba nyapsikiba, kum kekenamlume. Amutuku noutamak unamle ning deice arye, Israel ninye ati, malye kum ulinamsile. Tonda, melipsiniba, malye unyak nang arye amutuku noutamak unamlum ninye ati, ton yanuka kum onamsiake. Ayupu nirya ara, na Allah Yahweh, aning-aning nirya deice tam, talibuka Weik Erena Deiyok ununye, na arye tenenye touk dipkoprop wininune. Aning ara, dipkoprop nong upnamle ati, nyapsine.

**“Allah el si Yahweh arye, sik Israel ninye ati teleb ulinamle,” nyabuk yupu**

<sup>16</sup>Allah Yahweh arye, na Yehezkiel ati nyapnuk.

<sup>17</sup>Se, anda ninye arye deipkiknye koproba ulyame. Israel yala ninye ara, anggun mutuku koproba noutamak ulamik talak ara, sik malye

<sup>f</sup> **36:13** *Yahweh* – Allah el si koproba ara, Yahweh ulule. Ibrani yupu nyanyak kili sal arye ‘Allah el si koproba ara, lakak arye kum nyaptipnye’ tenen, ilil ulula ati ara, sikce huruf ‘YHWH’ aning uk sekenyake. Bukni, ‘YHWH’ ahuruf uk skipyop ura, ‘Ayupu nyana ara, walwal upsilyak’ tenen, nunce, ‘Yahweh’ sekenyabe. Indonesia Alkitab ara, Allah el si Yahweh ulul sukum ara, ‘TUHAN’ sekenyake. Ayupu bikna ati, laka nyan yupu nomor 49 dipdelulume.

ulamik ning ap, sik malye fil dolamik ning ap deice arye, sikce sik bidamnye ati, malye ulilalamik. Anang winilamik ning nirya ati, na arye elilamsirye, ‘Na fia like,’ tenelamse. Ara, kilapu sik ining balamle talak ara, sal arye, ‘Se, aning ara nun like’ tenen, malye kanye bolamak touk, na arye sik Israel yala ninye ati tenelamse.

<sup>18</sup> Israel ninye arye, fia malye-malye weik winilamika ati ara, na yu weik ulamnukba, weik wenena ning dobuka, sik anang deice bobuka delilamse. Winibuka wenelamse ning ara, talye ati kume. Ara, amutuku noutamak ulamik nang weika arye olamik ning ap, yuk talye ning ati, ‘Nun ni koproba’ tenen, Isa Mutuku Dongonye si erelamik ning ap ati, na arye wenen ning weika arye arelamse. Sik malye winilamik ning dekna ati, wenelamse.

<sup>19</sup> Na arye sik anang obuka, wenelamse ning deiyok ara ani. Sik babye malye fil dolamik ning ati, malye weik ulamik touk, ikin ning weik, sik nong deice delilamse. Ati, lo aryamseba, yuk mutuku ninye arye, Israel ninye yanuka olyangalamik. Tonda, Israel ninye ati malye kilamikce, sik nirya tapu koubuka, sik mutuku koproba bobinamikba, sikda amutuku noutamak daulamikce, pera mutuku noutam yuk-yuk ulamik. Sik nirya yuk-yuk mutuku noutam bobinamikba, ninye asik nang atonun, binuka ulamik. <sup>20</sup> Yuk pera mutuku datikilbinamikba, yuk-yuk mutuku ninye nirya elilamikce, nyalamik. “Se, sik Israel yala ninye ara, Allah Yahweh elce, ‘Aninye ara, na tenen ninye unamak’ tenen, wipdeiyamak bukni, malye ning uk talibuka ulamika ati ara, yuk mutuku nang arye, obuka sirya daklamikce, tapu koubuka yuk pera mutuku boyayike,” nyabuka, malye yupu nyalamik. Yuk mutuku ninye arye, amalye yupu nyalamika deice arye, na si yanilamnike, malye kililamnike.

<sup>21</sup> Yuk mutuku ninye nirya arye, Israel ninye malye weik winilamik ning elilamikce, na si koprop malye kililamnika ati ara, ikin kanye bobuka ulamse. Ara, ‘Se, Israel ninye, sik malye unyaka deice arye, na Allah fia malye ton una kumnye bukni, yuk mutuku ninye nirya arye, na si ati, malye-malye weik nyaninyake,’ tenen, mambul kanye bobuka ulamse.

<sup>22</sup> Ati ara, an nabi Yehekiel biti, an deice nyapnukin yupu bobuka, sik Israel ninye ati lyalbinamlyame. Na Allah Yahweh Weik Eitamnye birye, aning-aning nirya talibuka deice tam, Weik Erena Deiyoknye ununa ati ara, na tenenye touk wininune. Na arye anggun dam ton winipnamne ning ara, anggun Israel ninye melina ati kum winipnamne. Anggun Israel ninye ara, anggun balalum mutuku noutamak nirya, malye weik ulamlumba, yuk mutuku ninye elilamikce, na malye una fia kumnye si ati, malye yupu nyabuka, malye ulininyake. Na si ati malye nyaninyaka ati, sik nirya arye, ‘Se, Allah elda weik mambulnye,’ tenebikirye, ‘Kel biknamnyak’ tenen ati, na arye weik mambul fil donamne.

<sup>23</sup>Tonda, na Allah weik sisinanye, fia teleb si uk unutul bukni, anggun Israel ninye arye, ninye yuk mutuku nang noutamak umunce, malye weik umunba, sik yuk mutuku nang arye, na Allah si ati, malye yupu nyabuka, malye kilininyake. Ati, na arye weik mambul fil dopniba, eibicop ura, sik nirya arye, na si ati, 'Se, dipkoprop Allah elda, weik telebnye anya arye, el si ara weik mambule' tenen, kel biknamniyake. Tonda, anggun Israel ninye melinamsina deice arye, anggun dam weik mambul ning ton winipniba, ninye yuk mutuku ninye nirya eibikirye, 'Se, dipkoprop Allah el tonok ulule. Elda aning-aning nirya talibuka, deice tam ulirye, el tenelye touk ulule. Elda Allah Yahweh ulule' tenen, kel biknamniyake.

Ayupu ara, na si Allah Yahweh arye nyapsine. Na ara, aning-aning talibuka, deice tam Weik Erena Deiyoknye ununa ati ara, na tenenye touk, dipkoprop wininunye birye nyapsine. Ati, na arye anggun dam mambul weik fil dopnirye, lakak kipniba, yuk mutuku kili sal nirya arye, 'Se, Allah ara, weik mambulnye ulule. El si ara, fia teleb uk ulule' tenen, biknamniyake.

<sup>24</sup>Na Allah arye, mambul fil donamna ara ani. Sik yuk mutuku nang arye anggun Israel ninye tapu koubuka, yuk-yuk dabobinamsikba, ninye asik nang atonun ulamlum bukni, winitalak ara, na arye anggun bobuka, anggun mutuku koproba tamubuka boyanamsine. Dan mutuku do nirya, dabinuka ulamunya babye, na arye bulubuka anggun mutuku koproba, ila tamubuka deipsinirye, anggun mutuku koproba boyanamsine.

<sup>25</sup>Akunum boyasinyop ura, anggun nong nirya ara, na arye fia mek diksukum arye, anggun nirya mek likuka, teleb kipdeipnamsine. Winipsinyop ura, anggun malye umunce, Isa Mutuku Dongonye si erelulum ning nirya batakmumce, teleb uk unamlume. Ara, na arye mek diksukum busubuka, anggun nong deice purupdonoksinya deice arye, anggun talima fum tam malye winilulum ning ap, Isa Mutuku Dongonye si eremunye ning ap, nirya ara, kum danaipnamsine.

<sup>26</sup>Tonda, na arye anggun ti, winiryuk talima ap, winiryuk kanye tenen ning ap, punubuka aripnamsine. Minop talak ara, anggun talima kat keil atonun wamsuk ning ara, dobukapnerye, talima namin kibuka kwepdeipsinirye, fia winiryuk ning punubuka aripnamsine. <sup>27</sup>Winibuka teleb kipdeipsiniba, na yupu kekebuka diba tenepmunce, na amutam uk unamlume. Ara, na Dib Kanye anggun talima fum tam dongopnamsine. Dongopsinyop ura, na Dib Kanye melipsilya deice arye, anggunce, 'Se, nun Ni Koproba Allah arye nyasilye yupu nirya, moubuka kekepnamabe.' Allah arye, 'Wininamlulume, aning ara kum wininamlulume,' nyapdeipsilye yupu, 'Fia moubuka dobolbanamabe' tenen, kanye lamapdongobuka, teleb uk unamlume.

<sup>28</sup>Winipmunyop ura, na arye anggun apu yapu nang ati, aryamse mutuku talibuka unamlume. Winitalak arye dipdongobuka doryanamle

talak noutamak nirya ara, anggunda na mapu koproba, na tenen kili sal umunba, na ara anggun Ni Koproba Allah, anggun weik deiyoknye unamsine.

<sup>29</sup>Na arye anggun malye ululum ning nirya ara, kum daneipsinirye, teleb kibuka un ninye uk, kipdeipnamsine. Winipsinyop ura, anggun wa wibuka kounamlum ning, jagung atonun ning, el si gandum ara, na arye nyapniba, fia teleb kibuka bongobuka paplirye, duk weik mouplibuk, weika arye libuka dinamlume. Duk fia teleb uk mounamla ati ara, na mapu anggunda, din ning ton fia kum patanamsile. Kwaning patana li ton kum arenamsine. <sup>30</sup>Tonda, na aryuk anggun unamlumak ati, teleb tuku tonap tabakuka arenamsine. Winipsinyop ura, anggun wa wibuka kounamlum ning, ayala-ayala nirya ara, teleb ubuka paplirye, duk weik mounamle. Tonda, anggunce duk moulamlye yo, ayala-ayala nirya koupmunba, teleb ubuka bongoplirye, duk weika arye mounamle.

Ara, na melinamsina deice arye, nong kipdeipniba, bongoplirye duk mounamle. Winibuka melinamsina deice arye, din ning kanye imun ning ton fia kum patanamsile. Na arye wininamsin ati, sik amutuku-amutuku nirya unamak kili sal nirya arye, anggun ti ila tuba tonap, malye yupu kum nyanamsiyake. Anggun ti ila tuba tonap, kum nalina unamsiyake.

<sup>31</sup>Winitalak noutamak, fia teleb uk upmunyop ura, anggun minop talak malye fil dolamlum ning ap, malye winilamlum ning ap, malye kanye tenelamlum ning ap, tamubuka tenipmunce, ‘Se, nunda dipkoprop malye winilamupu,’ tenenamylume. Winipmunyop ura, anggun awinilamlum ning nirya ati, ‘Se, dipkoprop nunda, fia malye weik winilamupa deice arye, talima malye nang uk ulamupu’ tenen, tenepmunce, ikin kanye bobuka teninamlume.

<sup>32</sup>Se, Israel ninye ayala-ayala nirya, na arye mambul fil donamsina ara, anggun ti kum winipnamne. Anggunce moubuka tenelenamlulume. Na arye awininamne ning nirya ara, na fia teleb si ati wininamne. Anggun adib aryuk moubuka tenepmunce, ilil unamsile. Ara, anggun malye-malye weik ululum ning ap, kanye malye tenelulum ning ap ati, alye dakdamunce, ilil unamsile. Na Allah arye, anggun Israel yala kili sal nirya ati nyapsine. Na ara talinye kume. Na ara, aning-aning nirya talibuka deice tam, Weik Erena Deiyoknye ununa ati ara, na tenenye touk wininune. Ati, na arye ayupu nyapmasina ara, dipkoprop nong upnamle. Na Allah Yahweh arye nyapsine.

<sup>33</sup>Na Allah Yahweh aning-aning nirya talibuka, deice tam Weik Erena Deiyoknye ununye birye nyapsine. Na arye tenenye touk wininune. Anggun Israel ninye arye, malye winilulum ning nirya ara, akunum kum kipdeipnirye, lyepropsenyop ura, winipnamsine. Na arye nyapniba, anggun minop talak ulamlum mutuku, tamubuka binunamlume. Tonda, yuk mutuku nang arye, anggun asik daklomikba, oldem wamuk mutuku

uk tamubuka bimunce, ila tuba tonap anggun asik punubuka dopmunce, sik mutuku koproba noutamak uk, teleb kibuka unamlume.

<sup>34</sup>Tonda, minop talak, yuk pera mutuku nang arye, anggun ti tapu koubuka bobinamsikba, daulamlum talak noutamak ara, anggun mutuku koproba talye lo dem awamuk. Atalak ara, ninye yuk nang abisik balamikce elilamikba, ninye kum ulamikce, mutuku atonun wamuk. Winyamukce, amutuku tuku nirya malye wamukba elilamik bukni, na Allah arye amutuku tuku ara, ila tuba tamubuka teleb kipdeipniba, anggunce wa wibuka, teleb koun ning kounamlume.

<sup>35</sup>Winipnyop ura, ninye yuk nang nirya eibikirye, ngalukunamake. Sikce nyanamake. “Se, anango. Amutuku noutamak tuku ara, minop talak malye wamuk bukni, winitalak ara el urasin yuk upmale. Aning-aning nirya, kum papmanto tuku wamuk bukni, winitalak ara, fia teleb ubuka palule. Ara, Allah arye aning-aning kwepdeiyamuk talak, Eden ban mutuku noutamak wamuk touk kipdeipnamle,” nyanamake. “Tonda minop talak, yu nang arye, Israel ninye obuka sirya dakikce, aik nirya daklomikba, asik oldem uk wamuk mutuku nirya ara, winitalak ila tuba punubuka dobikce, ninye dem uk weika arye, langdibuka unyake. Aunamaka deice arye, mikip weik upra banamake,” nyabuka, fia kanye deibikirye, ngalukunamake.

<sup>36</sup>Ati, na Allah Yahweh arye, anggun Israel ninye ap, anggun mutuku ap, anggun aik ap, anggun wa tuku ap nirya, ila tuba tamubuka, akunum teleb kipdeipnyop ura, sik dana-dana tam unamak ninye, yuk-yuk mutuku nang ap, anggun neika unamlum nang ap arye, aning nirya eibikirye, kel biknamake. Ara, ‘Se, diba sik si erenyak Allah, el si Yahweh ara, fia dipkoprop aulule. Minop talak akunum dakuka bataklomikba, amutuku nirya oldem uk wamuk bukni, winitalak ara, Allah elcuk ila tamubuka lipsisikuka dopmale. Tonda, tuku sesal lebuka, mikamuk wa wina fia kumce, batakamik mutuku uk, tamubuka teleb ubdeipmala ati ara, winitalak ara, wa winyake’ tenen, kel kibikirye, na si uk erenamnyake. Anyapmasin yupu nirya ara, dipkoprop na Allah Yahweh arye nyapmasina ati, dipkoprop na arye, winipnamne. Talye ati kum nyapsine.

<sup>37</sup>Na Allah Yahweh arye, aning-aning nirya talibuka, deice tam Weik Erenanye ununa ati ara, na tenenye touk wininune. Na arye, “Se na mapu koproba Israel ninye,” nyalamsise. Anggunce na ti, ‘Se nai Allah, nun ti melipsilyame,’ nyabuka moronululum ning ara, kekesununa ati ara, na arye melinamsine. Na arye anggun ti nyapsine. Ara, yupu nyapnirye, anggun yupa tonap tabakuka aripsiniba, domba basam foka fum tam dongobikiba, nukmanto kumce, fia weik ulamle touk upnin banamsile. Na arye melipsiniba, anggunce mapu deipmunba, dadeipdanin banamak kili sal nirya ara, fia weik upre banamake.

<sup>38</sup>Winipmanto ara, minop talak na si eren ati, weik sum wamukba, na si eren ati ninye yuk-yuk danirye domba basam, fia weik bobuka,

Yerusalem mutuku uku dongolyangalamikba, domba basam nukmanto kumce, fia weik ulamik touk, na arye Israel ninye yupa fia weika kipdeipnamsine. Ninye yupa weik akunum ubikirye, minop talak yuk mutuku yu weik nang, yin bon nang arye, sik asik nirya uluplomikba, oldem uk ulamuk bukni, winitalak ara amutuku-amutuku nirya, ila tuba aik punubuka dobikirye, unamake. Ara, ninye yupa weik, kum nukmanto kibuka ulamikirye, amutuku aik nirya ninye aniryuk langdipnamake. Winipnyop ura, yata mutuku ninye do nirya, dipkoprop na Allah Yahweh ati, kel biknamniyake. Allah arye nyabuk.

### Israel ninye yok weik wamuk mutuku ati, nyabuk yupu

**37** <sup>1</sup>Allah el si Yahweh arye, na ti el mikip aripnuk. Atalak ara, Allah el Dib Kanye mikip, na nong deice yanuka bukukce, na bobuka ninye diplamik nang yok delilbalamik mutuku, lyu ak binuka deipnuk. Bobinuka deipnuk talak ara, dinmasiba, amutuku lyu nirya ara, ninye yok aryuk langdilamukak eipse. <sup>2</sup>Allah el Dib Kanye arye, melibuka bobanmanuka ani, amutuku lyu nirya, bobanmanukba eipsa ara, diplamik nang yok nyelelamuk ning uk, fia weik arye aulamukba, na asing arye eipse.

<sup>3</sup>Atalak ara, Allah el si Yahweh arye, na ti nyapnuke. “Se, anda ninye sirika arye, deiamkiknye anya arye, ance tenipdenulyame. Aselal lebuka nyelelul ninye yok nirya ara, ‘Tamubuka kam buklulume,’ nyaptipyop ura, kam bukting do, kum do?” nyabuka asipdenuk. Nyapnukba, na arye tamubuka nyapse. “Allah Yahweh aning-aning nirya, talibuka deice tam Weik Erena Deiyoknye umince, ‘Winipnamne,’ tenelyam touk, wininilyama ati ara, ance asipdenilam ning ara, fia dipkoprop an tonok ara kele. Na ara, na walwale,” nyapse.

<sup>4</sup>Nyapsop ura, Allah Yahweh arye na ti nyapnuk. “Nyapmanilama ati, anda na yupu laka nyana deiyoknye ulyama anya arye, na yupu dopropmince, sik yok nyelelul ning nirya ati, ‘Allah arye nyasilye yupu moubuka kekeplulume,’ nyapnulyame,” nyapnuke. <sup>5</sup>Nyapnukce, ayupu nyapdeipnuk. “Na Allah Yahweh, aning-aning nirya talibuka, deice tam Weik Erena Deiyoknye uniry, ‘Winipnamne,’ tenepnye touk, wininuna anya arye, na arye pupun dayuk ninye yok ati nyapne, ‘Anggun isin pupsinyop ura, anggun yok nirya, tuba tamubuka kam bukuka, kam unamlume,’ nyapmasine.

<sup>6</sup>Tonda, na arye anggun milmil ap, tup ap, tonok dukdongobuka, kitipdongopsiniry, anggun bol makuka kitipnamsine. Winipsinyop ura, na mikip arye, isin pupsinyop ura, kam unamlume. Winipmunyop ura, anggunce na Allah Yahweh ati, dib tenebuka biknamnulume. Ara, ‘Se, Allah Yahweh ara, dipkoprop ulule’ tenen, biknamlume.” Allah Yahweh arye, na Yehekiel biti nyapdeipnukba, kekepse.

<sup>7</sup>Ati, na Yehekiel birye, pupun danamuk ninye yok nirya ati, Allah Yahweh arye nyapmanuk touk nyapse. Na ayupu tuba nyanmase talak aniryuk, kekenmasiba, sik yok pupun danamuk ning nirya, yuk-yukak wamuka, atalak aryuk deiyok koubuka, tonok dukuldongonameka ati, ayok lelim ara, weik arye dirik-dirik abik. Weik arye nyeleng-nyeleng abikce, tuba tamubuka neika yanuka, dukdongobuka nong dukdongopdayikba, mince ulamik touk, nong yuk-yuk dukuldongolanmekba eipse. <sup>8</sup>Wininmok talak ara, na arye, ‘Yata wiripnamal do?’ tenen, moubuka dinmasiba, ayok nirya ara, milmil ap, tup ap, tamubuka dukdongobukce, nong nirya kipdeibuk. Winibuk bukni, sik nong nirya ara, isin min kum aribuk.

<sup>9</sup>Winibuka, isin kum arepmok ati, Allah arye na ti nyapnuke. “Se, anda ninye sirika arye, deiamkiknye ati nyapkine. Ance isin punanye bak, nyapnulyame. Pupun danamuk ninye nong nirya, isin dongona ati ara, winipnulyame. Allah Yahweh aning nirya talibuka, deice tam Weik Erenanye ulirye, ‘Winipnamne’ tenelul touk winilule. Elce nyapsile. Otam ap, eitam ap, outam ap, aulul kumanya nirya, dana-dana tam nirya ara, yamunce, minop talak oltaklamik ninye, sik pupun danamuk ning, yanuka weknulyame. Winitalak, sik nong dukdongobuka nong kipman deiyamik ning nirya, nong fum bisik yanuka, pupminba, sik nong nirya bupu upliba, tuba tamubuka kam buknamake,” nyapnuke.

<sup>10</sup>Ayupu nyapdeipnuka ati, Allah Yahweh arye, ‘Winipnamlyame,’ nyapmanuk touk, na arye winipse. Akumanye nirya arye, aninye sik nong fum bisik yanuka pubukop ura, kam bukuka tikik. Kam bukikop ura, sik yupa-yupa ara, fia weik ubuk. Winibuka akunum winibukop ura, ninye yupa deiyok tonok kibuka, nukman kumce, fia weik kibuk. <sup>11</sup>Winibik talak ara, Allah arye na ti nyapnuk.

Se, anda ninye sirika arye deiamkiknye bira, na yupu kekepnilyame. Aning ara ance moubuka biknulyame. Apun danamuk ninye yok nirya ara, an kayapu Israel yala ninye nirya daunyake. Israel ninye ayala-ayala nirya unyak ninye arye nyanyake. “Se, nun yok ara, akunum pun dasuke. Allah arye akunum luba kipsuke ati, dorupnin banamle talak nirya ara, yatanye birye lyepsuturye, lopdeipsutu do? Kum ati ara, nunda talye uk unamabe. Yo mungkaba dakaltaklamak atouk unamabe. Tonap, ‘Yatanye birye lyepnamsil do?’ tenen, fia kum tenenamabe.” Israel ninye arye nyanyake.

<sup>12</sup>Winibuka nyanyaka ati, na arye nyapnukin yupu dobuka, na tenen ninye, sik Israel ninye ati, laka nyapnalyame. Ayupu nyapnalyame. “Na Allah Yahweh, aning nirya talibuka, deice tam Weik Erenanye uniry, ‘Winipnamne,’ tenepnye touk wininuna anya arye, anggun diplamlumba, tuku palibuka weilamsika nirya ara, bublan kukuka, kam bukeipnamsine. Na Allah arye, na tenen ninye ati, aunyak noutamak arye dobuka, anggun ti aryamsise mutuku noutamak, tuba tamubuka

bobisinirye, deipnamsine. Amutuku tuba tamubuka aripsiniba, anggun amutuku noutam uk unamlume.”

<sup>13</sup> “Na arye aning nirya winipsiniba, na tenen ninye, anggun Israel ninye nirya kel biknamlume. Ara, tuku lukamsikak bublan kukipnirye, kam bukipsiniba, kam bukmunce, aning nirya eipmunce, ‘Se, nun Ni Koproba Allah Yahweh ara, dipkoprop ulule’ tenen, na ti dib tenebuka biknamnulume. <sup>14</sup>Tonda, na arye anggun nong noutam pupsinyop ura, na Dib Kanye anggun nong noutam deipsinyop ura, isin weksilirye, kam buk Dopnamlume. Winipsinirye anggun mutuku koproba uk tamubuka bobisiniba, binamlue. Winipsinyop ura, anggunce na Allah Yahweh ati dib tenebuka biknamnulume. Ara, se, nun ni Allah Yahweh ara, dipkoprop, ‘Wininamsine,’ nyapsuk touk, akunum wininmasile anya arye, ‘Aminyan talak babye, nun melina ati, fil donamsile’ tenen, biknamnulume.” Allah arye nyabuk.

**‘Yehuda yala ninye ap, Israel yala ninye ap, dukdongobuka tonok unamaka’ tenen ati, nyabuk yupu**

<sup>15</sup> Allah el si Yahweh arye, na Yehezkiel ati nyapnuke.

<sup>16</sup> Anda ninye tukwak nang arye deipkiknye bira, winipnalyame. Kama tonok dopropmince, ayo kama deice ara, ayupu seknulyame. Ara, “Yehuda arye deiamukba, dadeipdanin yangalamik ninye ap, tonda winitalak kili sal ap, neika unyak kili sal ani,” nyabuka sekeipnamlyame. Winipmince, yuk kama ton dobuka, akama bol deice ara, ayupu seknulyame. Ara, “Epraim yala nang, sik kama ara ani. Yusup birye deiamukba, dadeipdanin yangalamik ninye ap, tonda winitalak sik neika unyak ninye ap ani,” nyabuka sekdeipnamlyame. <sup>17</sup> Akunum sekminyop ura, akama bitinye dobuka, tonok tam taruk arye talipnulyame.

<sup>18</sup> Winipminba, an kayapu, sik neika umunye nang eibikirye, “Aning winipluma deiyok ara, yata ati winiplum do?” nyabuka asipdenamkiyake.

<sup>19</sup> Asipdekicop ura, nyapnalyame. “Kume, Allah el si Yahweh, aning nirya talibuka, deice tam Weik Erenanye ulirye, ‘Winipnamne,’ tenelul touk winilule. Elce nyasulule. ‘Na Allah arye winipnamsine. Efraim el kama ap, Yehuda el kama ap, neikak deipnamne. Deiyok ara, Efraim yala ninye ap, Yusup birye deiamukba, dadeipdanin yangalamikba, sik ap neika unyak ninye nirya ap dopropnirye, Yehuda yala ninye ap, sik ap neika unyak ninye ap, tonok yala kipdeipnamsine. Ara, Yehuda ap, Israel ap, tonok yala kipdeipnamsina ati nyapsine.’ Allah arye nyapmasile, nyabuka, laka nyapnalyame.” Allah arye, na Yehezkiel ati, nyapdeipnuk. Nyapnukce, ayupu ton nyapnuke.

<sup>20</sup> Akama bitinye bol deice, ayupu akunum sekmince, tonok tam taruk talipminyop ura, ayupu ton nyapnalyame. <sup>21</sup> Allah el si Yahweh arye, aning nirya talibuka, deice tam Weik Erenanye birye nyasulule. Na mapu

Israel ninye yala nirya ara, yuk-yuk mutuku ninye noutamak biyikce, dabinuka ulamica ani, aninye nirya tonokak, bulubuka deipnirye, anggun ti aryamsise mutuku tamubuka delilyanamsine. Tonok mutuku noutam uk unamlume.

<sup>22</sup> Winipnamne talak ara, sik nirya ara, tonok yala atonun ukirye, Israel mutuku uk unamake. Ati, sik aninye deiyok talibuka una ati, ninye deiyoknye, Raja, tonoknye aryuk, Israel yala ninye nirya talinamle. Sik aninye uk bokukabikirye, mutuku yuk-yuk talibuka kum unamake. Israel yala ninye ap, Yehuda yala ninye ap, mince bokuka yuk-yuk ulamik bukni, aminyan doryanamle talak noutamak ara, tonok mutuku noutam uk, tonok yala kibuka unamake. Sik Raja ara, tonoknye birye talinamle.

<sup>23</sup> Tonda, minop talak ara, Isa Mututku Dongonye si erelamikce, malye un ning weik arye, winilamik bukni, atalak arye diprongobuka dounamle talak noutamak nirya ara, aning nirya tuba tonap kum wininamake. Isa Mutuku Dongonye si erebikirye, malye un ning ton kum ubikirye, malye kum updeipdanamake. Na Allah arye, 'Like,' tenenun ning nirya kum wininamake. Atonun talye ning yupu nyana ap, kanye bona kum ning, ninye arye kintinibuka deibikirye, si erelamak ning ara, sikce kum erenamake. Tonda, na Allah ati, batakaninyakce, fia malye-malye weik ulamik ning ara, tonap kum wininamake. Bukni, aning nirya ara, na arye kum kipdeipnirye, aninye nirya teleb kipdeipniba, sik ti lyepropnamne. Winipnyop ura, sikda na mapu koprop unamake. Na ara, sik Ni Koproba Allah unamne.

<sup>24</sup> Tonda, na fil donanye Daud el yalanye wibuka deipnebuk, sik nirya talibuka ninye deiyoknye unamle. Winipmanto ara, domba basam weik unyak bukni, sik domba weina deiyoknye tonok ulirye, el domba nirya tonok kibuka deiplirye, teleb ubuka weilamle atonun, Israel ninye ayala-ayala nirya ara, sik deiyoknye tonok dem unamle. Elce Israel ninye nirya talinamle talak ara, sikce teleb un ning uk wininamake. Ara, na Allah arye, 'Aning ara wininamlume, aning ara kum wininamlulume,' nyapdeiyamse ning uk talibuka unamake. Na yupu nirya moubuka kekenamake.

<sup>25</sup> Minop talak, na arye na fil donanye Yakub biti aryamsibuk, elce deibukba, dadeipdanin balamik ninye ulamik mutuku uk fia ati binuka unamake. Ara, sik apu yapu ulamik mutuku uk, binuka unamake. Sikce deibikiba, dadeipdanin banamak ninye nirya babye, amutuku uk talibuka fia aunamake. Ara, winitalak ululum ninye ap, aminyan talak sik mapu ap, tonda sik mapu arye deipdanin, banamak mapu ap, doyanamle talak deibikiba, dadeipdanin banamak ninye nirya ap, sik nirya amutuku noutam uk teleb ubuka unamake. Unamak talak ara, Daud el yalanye birye, ninye deiyok kibuka aninye fia talinamle. Sik Sisinanye el tonok unamle.

<sup>26</sup> Na Allah ap, sik Israel ninye nirya ap, ansinibuka teleb uk una ati, nyalina yupu tonok ning nyapdeipnamne. Ayupu ara, fia min kume kum

danamle yupu anye arye, fia aunamle. Winipnyop ura, na arye sik ti, fia melibuka kaliklamniba, fia teleb uk unamake. Na ara, sik dam uniryeye, sik ti melinamna deice arye, sik yupa weik arye, tonap tabakuka upre banamke. Aunamak mutuku noutam uk, na si erena aik dopdeipniba, fia ati asukum uk unamle. Na si uk fia erenamniyake.

<sup>27</sup>Winipnyop ura, na ara sik ap, fia neika unamabe. Na ara sik Ni Koproba Allah unamne. Sikda fia na mapu koprop, na tenen ninye unamake. <sup>28</sup>Na si erena ati, fia teleb aik ara, na mapu Israel ninye sik unamak mutuku noutamak aunamle. Anyaik ara, fia aunamle. Na nyapmasin touk akunum winipnyop ura, sik yuk-yuk mutuku unyak ninye nirya arye aning eibikirye, na Allah Yahweh dib tenebuka biknamake. Ara, 'Se, Israel ninye sik malye unyak ning kum kipdeiplirye, sik ti teleb kibuka deililul Allah ara, Allah Yahweh elcuk teleb kibuka delisilule,' tenebikirye, biknamniyake. Allah arye, na Yehezkiel ti nyapnuke.

*[Minop talak sekamik buku ara, pasal 38 sampai pasal 48 ton awamuk bukni, aning nirya kum sekupu. Aning ati ara, buku Yehezkiel ati ara, akunuma. Winitalak otam buku, Daniel dukdongobuka nyapnin banamlulume.]*